

元史新編

元史卷九十五

外國

高麗

高麗屬禹冀州之地本周箕子封國

尙書大傳云武王釋箕子之囚箕子不忍

周之釋走之朝鮮武王卽其地封之

後爲夫餘別種曰朱蒙者居之始建國

號高句驪因以高爲氏其孫莫來并夫餘裔孫位宮以魏

正始三年入寇西安平

遼東屬邑

始見載記其國東西二千里

南北千五百里東南跨大海西北渡遼水接營州而靺鞨

在其北其國都曰平壤城卽漢玄菟郡隨山爲郭山曰神

嵩有水出靺鞨之白山者號鴨淥江而平壤在其東南因

恃爲天塹後闢土益廣合古新羅百濟爲一東南至六千

里

按百濟卽後漢末夫餘王尉仇之後初以百家濟海故名遼東有三韓曰馬韓辰韓弁韓新羅本辰韓種其王

金姓唐時盡有百濟之地以新羅爲東州樂浪府號東京百濟爲金州

金馬郡號南京平壤爲鎮州號西京凡三京四府八牧郡

四十二州百有十八縣三百九十鎮三千七百洲島其水

有大遼少遼沮水梁水惟馬皆卽鴨綠江鹽難二水合流最大

官凡十二級曰大對盧或曰吐粹曰鬱折曰太大使者曰皂衣

頭大兄皆秉國政次大使者次大兄次上位使者次諸兄

次小使者次過節次先人又有古雛大加專掌賓客隋書云有

太次大兄次大兄次小兄次對盧次意侯奢次烏拙次太次

使者次大使者次小使者次再奢次翳屬次仙人凡十二

等國分五部曰內部卽漢桂婁部曰北部卽絕奴部曰東

部卽順奴部曰南部卽灌奴部曰西部卽涓奴部其大城

置倭薩比都督諸城置處閭近支亦號道使比刺史武官

曰大模達比衛將軍末客比中郎將王令曰教曰宣臣民

呼王曰聖上私謂曰嚴公后妃曰宮主士以族望相高柳
崔金李四姓爲貴種無宦者以世族子爲內侍六衛歲十
二月朔王坐紫門小殿注官外官則付國相王服五采白
羅冠革帶皆金釦大臣青羅冠次絳羅珥兩烏羽金銀雜
釦簞褻衫大口袴白韋帶黃革履隋書云人皆皮冠貴者冠用紫羅使人加插烏羽
庶人衣褐戴弁婦人鬢髻垂右肩餘髮披下約以絳羅
貫之簪兵器與中國略同樂有五絃琴箏觿栗橫吹簫鼓
之屬無金石音喜弈投壺楚鞠食用籩豆簋簠洗居依
山谷草茨屋者十之八堂上設席升必脫屣見尊者則跪
應必唯以趨爲敬立各反拱行各搖手拜則曳一腳人首
無枕骨背扁側好蹲踞昏娶不納聘幣王女不下嫁必歸
之兄弟宗族其貴臣亦然父母夫喪服三年兄弟三月殯

於家經三年而葬尙釋教雖王子弟常一人爲僧無道士
多淫祠國左有大穴曰禊神每月望王自臨祭歲初聚
戲泃水之上王乘腰舉列羽儀觀之事畢王衣服入水分
左右爲二部以水石相濺擲喧呼馳逐再三而止王每出
則前捧護國仁王經爲導貢士分三等王城曰上貢郡邑
曰鄉貢他國人曰賓貢王三歲一親試以詩賦論亦有制
科宏詞之目百官皆給田代祿民十六以上計口授業有
警則執兵任事則服勞事已復歸農畝惟六軍三衛常畱
官府賦稅則絹布及粟隨所有量貧富差等輸之其治峭
法以繩下叛者縛諸柱叢炬焚而斬之降敗殺人罵父母
者斬盜及犯賊十倍取償日中爲虛用米布賈易不知鑄
錢後學鼓鑄有海東通寶重寶三韓通寶銅錢然其俗不

便也自位宮七葉孫高璉當晉義熙中遣使獻赭白馬璉
七傳至元隋文帝時率靺鞨之眾寇遼東帝遣漢王諒討
之元懼請罪煬帝徵元入朝不至親征之初渡遼而敗再
征而楊玄感反三征而天下亂唐高祖武德四年遣使朝
貢受正朔元在位十八年卒其後東部大人蓋蘇文弑其
主高武卽元異母弟也太宗親駕伐之不克高宗乾封中
乘其內讐討之拔東京置安東都護府高氏遂亡武后垂
拱中仍求其裔寶元爲遼東都督朝鮮郡王遣回統安東
舊部後唐莊宗同光中累奉職貢長興元年權知國事王
建始代其位遷都松岳明宗始封建爲高麗國王石晉開
運中建死子武襲沙陀漢乾祐末武死子昭襲宋太祖開
寶中昭死子佺襲太宗太平興國七年佺死弟治襲淳化

五年治以受制契丹走使來乞師不許自是朝貢中阻治死弟誦立誦死弟詢立先是高麗屢爲契丹侵陵乃築六城於境上曰興州鐵州通州龍州龜州郭州契丹惡其貳已襲取之詢徙避昇羅州眞宗大中祥符八年詔登州置館海次以待來使天禧改元詢孫徽嗣立陰受契丹封冊乞改貢道由明州尋獻日本所造車曰諸侯不貢車服故不敢與土貢同神宗出萬緡賞之徽在位三十八年卒次子運嗣運卒弟熙立凡數歲貢使不至熙避遼主諱改名顒哲宗元祐四年有僧至杭州言國母使持二金塔爲兩宮壽知州蘇軾奏卻之軾後爲禮部尚書言高麗入貢無絲髮利而有五害徽宗崇寧中顒死子侯嗣貢道復通宣和四年侯死子楷嗣南宋慶元閒禁商人持錢入高麗往來遂絕金主取汴楷復臣

事之元興又與金絕自建傳十數世至王曦凡三百餘年未易姓元太祖十一年契丹人金山元帥六哥等叛領眾九萬餘奔高麗入據江東城帝遣哈只吉劄刺等領兵征之國人洪大宣詣降且請爲鄉道攻圍其國國王懼奉牛酒出迎更遣上將趙冲其討滅六哥等劄刺遂與冲結爲兄弟約每歲輸貢賦自是使命接踵久之漸渝約十九年遣使著古與趣貢獻未至爲盜所殺後積七歲絕信使太宗三年遣元帥撒禮塔討之國人洪福源迎降卽大宣子也師抵王京招其主王曦曦遣其弟懷安公佺請和許之置京府州縣七十二達魯花赤監治其國遂班師明年曦復叛盡殺所署官吏退保江華島復遣撒禮塔討之至王京中流矢卒師還曦遣將軍金寶鼎等上表陳情願悔過

帝數其罪令來朝未幾噶悉眾攻陷西京已附降民劫大
宣東去帝怒命唐古及福源再討之拔龍岡咸從等十餘
城噶復遣金寶鼎等奉表來貢詔徵噶入朝噶以母喪辭
自是屢遣其臣納貢而蒙古師進攻不輟取昌朔諸州高
麗勢日挫走使諭噶親朝當罷兵噶不得已以族子綽爲
己子入質定宗二年以歲貢不入命將阿母侃征之不克
憲宗三年命宗王耶虎與福源同領軍征之拔禾山東州
春州三角山楊根天龍等城五年改命劄刺解與福源再
往拔光州安城中州玄鳳珍原甲向玉果等城噶懼遣其
世子僂赴闕時帝方親攻宋崩於合州畱僂未遣還世祖
卽位廉希憲趙良弼進曰高麗雖小國依山阻海國家用
兵二十年尙未臣服前歲世子王僂來朝適鑿輅西征羈

旅者五年矣供張疏薄無以懷輯其心一旦得歸將不復來宜厚其館穀待以藩王禮且聞其父已死不若立之爲王送之歸國彼必感厚施願修臣職是不勞一卒得一國也帝是其言卽日改館世子中統元年三月冊爲高麗國王以兵衛送歸詔班師仍赦其境內制曰我太祖肇開大業列聖相承代有鴻勳芟除羣雄奄有四海未嘗專嗜殺也凡屬國列侯分茅錫土傳祚子孫者不啻萬里孰非歸之勁敵哉今普天之下未臣服者惟爾國與宋爾宋所恃者長江而長江失險所藉者川廣而川廣不支邊戍自撤其藩籬大軍已駐乎心腹鼎魚幕燕亡在旦夕初世子奉幣納款束身歸朝含哀請命良可矜憫故遣歸國完復舊疆安爾田疇保爾家室弘好生之大德捐宿構之小嫌用

是戒敕邊陲斂兵待命今得世子與邊將書乃知爾國情
僞朕甚疑焉如謂果內亂邪權臣何不自立而立世孫如
謂傳聞之誤邪世子何不之國而盤桓境上豈以世子之
歸愆期而左右自相猜疑私憂過計而然邪重念島嶼殘
民久罹塗炭窮兵瀆武殆非本心且推心置腹則反側自
安悠悠之言又何足校申命閩帥斷自朕衷無以逋逃閒
執政無以飛語亂定盟惟事推誠一切弗問宜施曠蕩之
恩一新遐邇之化自尙書金仁雋以次中外枝黨或有首
謀梗化旅拒王師已降附而輒叛因仇讐而擅殺無所歸
而背主亡命不得已而隨眾脅從者罪無輕重咸予自新
世子其趣裝歸國解仇釋憾布德施恩緬惟瘡痍之民正
在撫綏之日出彼滄溟宅於平壤賣刀劍而買牛犢舍干

戈而操耒耜凡可利濟無憚勤勞苟富庶之有徵冀禮義
之可復亟正疆理以定民心我師不復越界大號一出朕
不食言敢有踵亂犯上自干典刑者國有常憲人得誅之
世子其恭承丕訓永作東藩以揚我休命俟求去水就陸
以免軍馬侵擾從之六月俛遣其子僖來賀卽位以國王
封冊印及虎符賜之次年夏俛來朝尋更名禎遣其子堪
以聞賜禎玉帶一遣官護堪歸禎遣侍御史張鑑奉表入
謝三年正月賜禎中統麻詔曰獻歲發春式邁三陽之會
對時育物宜同一視之仁眷爾外邦忠於內附肇因正旦
肅展賀儀方使介之言旋須筴書之播告今賜中統麻一
道卿其若稽古典敬授民時勸彼東隅之民勤於南畝之
事茂迎和氣迄用康年時乃之休惟朕以懌見典章禎遣使

奏謝詔諭補籍編民出師旅輸糧餉助軍儲補初置不答
帝詰其使者補表乞俟民生稍集然後惟命帝謂其詞意
懇實允之歲進方物亦止稱其力且諭高麗上京等處毋
重科斂民補以免置驛罷互市蠲酒課諸事遣翰林學士
韓就入謝賜蜀錦一羊五百仍召補入朝五年正月朔補
遣使賀正旦六月補朝於上都修世見禮九月頒改元詔
於其國禁登州和州并女真人毋侵高麗界立瀋州以處
降民間補病帝親和藥賜之至元二年春補遣其弟公珣
入貢六月遣陪臣榮允伯來賀聖誕歲如例終世祖世入
貢者三十六會朝正者二十年臣事維謹先是帝欲通好
日本遣侍郎黑迪殷宏充國信使先至高麗使爲鄉道補
遣樞密副使宋君斐等導往不至而還黑迪反命帝責補

飾辭令去使徒還復加開諭以必得日本要領爲期禴謂海道險遠不可以辱天使復遣起居舍人潘阜書狀官李挺充國信使持書去畱六月亦不得達會其弟安慶公涓入朝帝面數其欺慢特遣總管于耶孫脫郎中孟甲持詔諭禴曰昔我太祖法制凡內屬之國納質助軍輸糧設驛編戶籍置長官在太祖時王綽已嘗入侍郵傳亦已粗立餘率未奉行今將問罪於宋爾所助軍士幾何舟艦幾何輸糧則宜早爲儲積故以問之禴受詔卽遣門下侍郎李藏用來京師帝敕藏用曰往諭爾主速以軍數實奏將遣人督之爾當造海舟千艘可載四千石者藏用曰舟艦敢不供給但人民殘少恐不及期往者臣國有軍四萬餘人年間死於兵疫賴聖德撤兵以來生長者僅十歲耳帝又

曰自爾國來者言海道之事於宋得便風可三日至日本則朝發夕至舟中載米海中捕魚爲食豈不甚易歸可以此意諭爾主隨命都統領脫朵兒王國昌等至其國督軍造船補出昇天府迎之願備兵一萬船千艘詔脫朵兒往閱并相視黑山道路仍命耽羅別造船百隻以俟調用耽羅高麗與國也其始末無攷帝銳意欲通日本遣黑迪等仍出高麗令重臣導送勿致如前稽阻補遣知門下省事申思全及潘阜從黑迪等偕去往返三載訖無成功後命祕書監趙良弼再往高麗導之始至其國具見日本傳六年秋世子堪倉皇入見泣奏權臣擅廢補而立其弟湍國內大亂帝憫之遣幹朵思不花李諤等至其國詳問且敕萬戶宋仲義督兵往討兼授懋特進上柱國假師三千赴國難未幾湍遣尙書

金方慶至表訴國王禎邁疾令涓權國事帝知禎涓廢置
皆權臣林衍所爲遣判官徐世雄召禎涓衍等同赴闕面
訴情實更命國王頭輦哥率兵壓其境如踰期不至卽當
窮治首惡剿戮無遺命趙璧行省東京有都統領崔坦等
挈西京五十餘城內屬詔改東寧府畫慈悲嶺爲界以忙
哥都爲安撫使戍之初戶部尙書馬亨言高麗在漢晉時
皆爲郡縣今雖來朝其心難測莫若嚴兵假道以取日本
爲名乘勢襲其國定爲郡縣至是又言高麗既有內讐不
宜加兵彼旣上表言情宜赦其罪戾減其貢獻安撫其民
使之感慕聖化俟南宋已平彼有他志回兵誅之未晚前
樞密院經歷馬希驥亦言今之高麗乃古新羅百濟高句
驪三國併而爲一大抵藩鎮權分則易制諸侯強盛則難

馴宜驗彼州城軍民多寡離而爲二分治其國俾權倖勢均自相維制實今之良圖議未決會禎已受詔復位明年二月入覲乞罷兵帝以衍廢立豈可釋而不誅沮權國事非得已在所寬宥自餘脅從誑誤一無所問遣軍護禎還國命脫朵兒焦天翼充其國達魯花赤同往鎮之竝敕軍士毋擾俄報林衍已死其子惟茂擅襲令公位亦爲其下所殺衍黨裴仲孫招集餘眾更立禎庶族承化侯爲王劫府庫圖籍竄入珍島大軍進次王京西關城遣人收衍妻子禎入居舊京詔忻都史樞爲經略使領兵五千人洪茶兀以舊民二千人屯田金州爲定高麗兼取日本計茶兀福源子也八年二月命元帥忽都答兒持詔諭裴仲孫仲孫乞退軍然後降帝怒其欺罔遷延歲月不允趣分道進

兵五月忻都與史樞洪茶斤大敗珍島賊獲承化侯斬之
脅從民戶皆降禎遣上將鄭子瑛表謝且令懃率尙書右
丞宋玠軍器監薛公儉等二十八人入質未幾帝遣懃還
且轉東京米二萬石振其饑時仲孫餘黨金通精竄入耽
羅廷議耽羅國主嘗來朝覲今旣納其叛臣舉兵討之義
所應也請先平耽羅然後觀兵日本會禎亦請討耽羅餘
寇帝發高麗軍六千人益以武衛軍出兵船百有八艘命
忻都茶斤領之人海拔其城禽通精誅之立耽羅招討使
司其貢賦歲進毛施布百匹時至元十年六月也先是禎
遣樞密使金鍊奉表入見請結昏帝許之十一年五月皇
女忽都魯揭里迷失下嫁世子懃七月王禎薨來告且遺
表言懃孝謹可付國事帝命懃歸襲爵懃遣其齊安侯王

淑來謝恩十一月皇女入高麗慙遣其帶方郡侯王徵率子弟二十人入侍十三年慙奏改名嗜賜駙馬高麗王印以其官制僭濫諭嗜改正時帝方用兵日本或僉軍高麗或伐材耽羅歲無虛日十七年秋嗜入朝願益兵自效帝大喜加嗜左丞相行中書省事嗜簡兵萬人水手萬五千人戰船九百隻軍糧十萬爲助日本惡其侵己也潛出偏師寇其邊海郡邑燒居室掠子女而去詔立金州等處鎮邊萬戶府率蒙古軍戍之嗜亦不勝其憤請更造船百五十艘助征帝益喜賜嗜金印并以耽羅所造戰船給其軍二十年立征東行省嗜與右丞相阿塔海共領省事明年春嗜及公主率其子諫來朝帝嘉其賢錫號安平公主制曰朕嗣有令緒時庸展親眷先朝帝女之賢視今日宗藩

之貴肆揚渙號用率彝章釐降高麗國王公主忽都魯揭里迷失毓秀天潢承徽宸極孝恭有則早閑壺範之慈戒敬無違特借公宮之重正嬪儀於貳館敦王化於三韓車服不繫其夫義方以教其子既優既渥實惟茅土之分來歸來寧與覩邦家之慶因廷臣之建議卽國邑以疏風於以錫丹闡紫詔之恩於以彰赤屬駟車之寵於戲周王姬爲婦道之準成其肅離唐漢陽以王姑之尊戒乎驕侈罔俾前代得專令名

見卷蒙集張伯潛撰

二十三年遣使獻日本俘十

六人詔加睿太保二十六年置高麗國儒學提舉司以其國多產銀遣工卽其地開冶輸官睿每歲貢其所產紬布氎布線綢動以千計二十八年睿乞以子諫爲世子授特進上柱國賜銀印尙薊國長公主歲饑給米二十萬斛明

年又告饑賜米十萬石三十年二月曙請更名詎詔賜功
臣號制曰咨爾高麗國王王詎秉心直諒賦質貞純早克
嗣於先猷久服勞於王室身惟國壻寅居賓日之方男卽
皇甥復預乘龍之選築館荷兩朝之眷分茅襲百祀之傳
肆升右揆之階光應上台之象茲薦頒於寵數其益勵以
忠勤動惟一德之懷居必正人是與祖宗世稱漢藩輔保
樂土於三朝父子竝爲周司徒播清風於高古可特加純
誠守正推忠宣力定遠保節功臣尙服渥命以介福祺元見
文類張成宗卽位詎入朝上言耽羅自祖宗以來臣屬本
土觀撰國逆黨林衍旣平之後改隸朝廷乞仍其舊帝報可大德
改元詎請老傳國與子諫詔諫襲王爵加詎爲逸壽王二
年中書省奏諫擅命妄殺遣右丞楊炎龍召諫入侍畱京

師仍以昨統國政降詔戒飭曰自今以始勉遵守國之規
益謹畏天之戒毋積匪彝自干憲典會使者哈散還言詎
不能服眾朝廷宜遣官共理於是復立征東行省命闕里
吉思爲高麗行省平章比至上言國王自署官府三百五
十八所官四千五十五員其王用曲蓋龍辰警蹕諸臣舞
蹈山呼一如朝儀僭擬尤甚帝遣尙書王泰亨往釐正之
旣而詎言昔居海島時嘗用山呼後改稱千歲今旣奉明
詔一切皆罷己革官府九十餘所汰官吏二百七十餘員
今設行省監治非便帝亦以闕里吉思不能和輯其民仍
罷征東行省初詎旣復位委用羣小厚斂淫刑國人羣愬
於朝廉得其相國吳所專權離閒狀遣翰林直學士王約
驗問約至宣布明詔而諭之曰天地間至親者父子至重

者君臣彼小人知自利寧肯爲汝家國地邪。詎感泣曰：臣年耄聽信僉邪，是以此今聞命矣。願奉表自雪，且請子諷還國。好黨悉從約治，乃徵所赴闕。鞠之流安西。約命故臣洪子藩爲相，俾更敝政，罷非道水驛十三，免耽羅貢。非土產物，東民大喜。十年春正月朔，詎遣使入賀。自至元二十年後，高麗朝正使者不時至。至是適一會焉。五月，詎卒。遣諫還國，復襲位，仍置征東行省，鎮之。諫尋請改名章。高麗作史武宗卽位，進封瀋陽王，加恩三代。其贈曾祖父制曰：昔我太祖之奮舉漠北也，東旌西旆，北甸南服，昭德示威。所向臣妾，惟時三韓境壤相聯，天戈一臨，故高麗王王暉深察機運，舉國內向，事會之來，閒不容髮。自非秉志端慤，明識遠慮，疇克如是哉！又屬遼民餘孽，潛竊島嶼，狂肆弄

兵陸梁假息重煩命將致討於時冰雪沍寒饋餉不通而
噉乃能供億轉輸師皆宿飽軍興器仗資助無闕復濟師
徒往殄殘寇其於肇造開基立勳王室保民興邦莫之與
比故得守土享年殆將四紀澤及後昆流慶斯永傳子若
孫與國連戚不其躋與是宜追崇上爵仍易嘉名魂而有
知歆茲異數可追贈忠獻

見元文類
姚燧撰

其贈祚制曰洪惟我

祖天錫勇智正萬邦迺眷爾家世篤忠貞有成績蓋本深
而未茂其德厚者流光故高麗王王祚祇訓向方飭躬迪
吉佩服儒雅奮勵材猷初父命之親承以土宜而入貢會
桓肅西巡於川徼而世皇南撫於江壖亟期行李之通寧
恤歲華之易途屯以永內訌仍邁於家艱號渙其申還納
旋膺於晝接中統之風雲載啟三韓之疆宇重臨從容必

中於事機造次弗忘乎禮憲百遣明廷之質有來冢嗣之
良釐降展親示渥特殊於他姓服勤尊主輸誠益拱於中
天不諫是征屢爲先道奉朝斯謹罔失常期孫繼尙夫皇
姬國允資乎碩輔有爲有守昔戡濟之功多言盛言恭茲
彌諧之望著盍旌舊哲庸賁嘉稱太師維垣爵以馭其貴
君子如祉制以象其賢庶幾往訓之遵亦曰徽彝之舉嗚
呼匪報也永爲好也恩隨鸞檢以晷流惟有之是以似之
系與鴨江而竝遠可追諡忠敬王構撰其贈詎制曰朕觀今
天下有民社而王者惟是三韓及祖宗而臣之殆將百載
厥父節而子復宜播曰我舅則吾謂之甥旣勳以親宜貴
與富禮克先於事大典可後於追崇故高麗國王王昺移
孝作忠易戒以惠禮樂刑政之修者典章文物皆燦然惟

大猷之是經與小心之以翼初由世子已帝女之降釐旋
俾嗣王非公孫之復始遂罷時貢其方物願同歲賜於宗
親責秉鈞以東征期奠枕乎南面追叛王挺身於遼水出
選兵壓卵以泰山戰踵未旋逆首已授雖居位未周夫三
紀而享年實過乎七旬中壽共言今代希有矧其子式穀
之是似則斯人沒世爲不忘自官階而進之至師垣而極
矣夫旣封玄菟之墓表滄渤以爲襟何必刑白馬之盟誓
黃河以如帶尙期貞魄庸服恤章可追諡忠烈姚燧撰至大
元年章言陛下令臣還國復設行省民不勝其擾帝準世
祖舊制罷之遼陽右丞洪重喜訴章不奉國法恣暴等事
省臣請對狀帝令毋辯對命章從太后之五臺山尋賜章
功臣號改封瀋王仁宗皇慶二年章遜位詔其子燾襲舊

封初尚濮國長公主繼尚曹國長公主尋以肅弟暉爲王

世子娶梁王松山女英宗卽位召章至畱之上都泰定改

元敕還國仍歸其印

高麗史云世子如元謁帝便殿問讀何書對曰有師儒鄭可臣閱讀從行

宿衛之暇時從質問孝經論語帝悅命引與俱入賜坐問

本國世代相傳之序理亂之跡風俗之宜聽之不倦其後

命公卿議征交趾又召與同議二人對稱旨於是授可臣

翰林學士直學士一日帝召見世子於紫壇殿可臣從

帝命脫笠曰秀才不須編髮宜著巾御案前有物大圓小

銳色深而貞高尺有五寸內可受酒數斗云摩訶鉢國所

獻駝鳥卵也帝命世子觀之並賜酒可臣獻詩云有卵大

如囊中藏不老春願將千歲壽懸及海東人帝嘉之輟賜

御羹按世子卽王章嘗構萬卷樓於京師者可臣在東國

撰千秋金鏡錄漬增修之曰世代編年節要七卷又撰本

國編年綱目

四十二卷

三年正月朔章遣使賀正旦文宗天曆二年

正月朔賀使再至是冬燾以久病不視事請命其子楨襲

位三年正月朔楨遣其臣元忠奉表稱賀未幾燾病愈命

仍爲國王賜金印順帝後至元初詔徵其王阿刺忒納失

里入朝賜金一錠鈔二千錠至正四年特授八禿麻朵兒只嗣高麗國王十年以瀋王之孫脫脫不花爲東宮怯薛官明年詔以國王不答失里之弟伯顏帖木兒襲王封而廢其子會日本賊過海剽掠自稱島居王伯顏帖木兒勦捕之特賜金繫腰十四年封脫脫不花爲瀋王賜伯顏帖木兒爲親仁輔義宣忠奉國彰惠靖遠功臣二十二年帝以讒廢伯顏帖木兒立其弟塔思帖木兒爲王國人上書言舊王不當廢新王不當立不聽復以皇后奇氏族子三寶奴爲元子以兵萬人送之國至鴨淥江爲伏兵所敗僅餘七十騎還京師時朝廷屢遣使至高麗選取媵妾國中每生女不舉女長不嫁而皇后奇氏初以高麗女入宮見寵爲皇后奇族之在本國者多怙后勢驕橫伯顏帖木兒

怒盡殺之以故奇后日讒於帝任情廢立軍旣敗歸未幾元亡自燾後嗣王皆以蒙古爲名皇慶而後史亦不載特按諸本紀序之如此

日本

日本在東海之東與高麗相近東北有毛人國大山隔之

西南至海西北至百濟北距新羅水陸三千里

僧齋然謝表有望落

日而西行十萬里之波濤難盡顧信風而東別數千里之山岳易過季夏解台州之籠孟秋達本國之郊爰逮明春

初到舊邑等語

依山島而居左右小島五十餘皆自名國而臣附

焉其境東西五月行南北三月行地勢東高西下建都邪馬臺去中國萬二千里古名倭奴國唐時稍習夏音惡其稱以近日所出更名日本或云日本小國倭併之而冒其號自謂秦伯之後未詳其由漢光武中元二年遣使入朝

自稱大夫安帝永初元年亦遣使朝貢桓靈之間其國大

亂更相攻伐歷年無主有女子名卑彌呼年長不嫁

宋史云初

主號天御佛二十三世至彥瀲竝以尊爲號居筑紫城日向宮彥瀲子神武以甲寅卽位當周僖王時遷大和州樞原宮傳六十四世至守平值宋雍熙中竝以天皇爲號按其世次則卑彌呼當是彥瀲下第十九世反正天皇也

能以鬼道惑眾於是國人共立爲王有侍婢千人擁之罕

見其面唯男子二人給王飲食傳言語王姓阿每氏

宋書云以

姓王爲魏明帝景初二年倭女王始遣大夫貢獻詔稱親魏

倭王正始中卑彌呼死立其宗女壹與爲王其後復立男

王受中國爵命晉武帝太始中遣使重譯入貢劉宋永和

二年倭王讚修貢職至曾孫武當昇明二年遣使上表曰

封國偏遠作藩於外自昔祖禰躬擐甲冑跋履山川不遑

寧處東征毛人五十五國西服眾喚六十六國渡平海北

九十九國臣雖下愚忝承遺緒驅率所先歸崇天極道逕
百濟方理舟航而高麗無道圖欲見吞虔劉不已每致稽
滯臣欲整練甲兵摧此強敵剋靖方難無替前功竊自假
開府儀同三司其餘咸各假授因詔除武使持節安東大
將軍倭王相傳其王以天爲兄曰爲弟天未明時聽政踟
跌坐日出卽止云委我弟俗亦好儒雅有文字彥瀛後十
六世其主
應神始於百濟得中國文字時
有大臣號紀武內年三百七歲知卜筮尙浮屠法尤信巫
覓其官十有二等以大小德仁義禮智信爲紀有軍尼百
二十如牧宰每八十戶置一伊一作仍尼翼如里長十伊尼
翼屬一軍尼置本率一人檢察諸部宋書云凡五畿七道
三島三千七百七十
一都四百
一十四驛其男子衣裙襦袖微小漆履繫足庶人則跣不
得用金銀爲飾垂髮兩耳上椎髻無冠及隋煬帝賜其民

錦綾冠始得其制以服文布爲衣左右佩銀礮長八寸以

多少別貴賤婦人束髮於後亦衣裙襦裳皆施襪

襪字記曰襪音

撰綠也

男女多黥臂點面文身沒水捕魚

漢書云刻其肌以丹青涅之入水可

避蛟龍之害

好碁博握槊擣蒲性嗜酒人多壽考無城郭聯木

爲柵以草茨屋有弓矢刀稍弩鑽斧漆皮爲甲骨爲矢鏃

殺人強盜及姦皆死盜者計贓酬物無財者沒身爲奴俗

安靜罕爭訟盜賊亦少無牛馬虎豹有獸如牛名山鼠有

火蛇能吞之地膏腴氣溫煖五穀無黍交易用銅錢文曰

乾文大寶性質直有雅風婚嫁不取同姓國多女大人皆

四五妻婦人歸夫家必先跨火

通典作跪火

無盤俎藉以櫛葉

手舖之東奧州出黃金西別嶼皆銀礦山多白珠青玉產

銅及丹土有如意寶珠其色青大如雞卵夜有光云魚眼

晴也自魏至齊梁代與中國通隋大業三年其王多利思
比孤遣沙門數十人來學佛法其國書曰日出處天子致
書曰沒處天子無恙煬帝覽之不悅明年遣文林郎裴清
使倭國渡百濟東至一支國又經竹斯國又東至秦王國
其人與中夏無別既達海岸倭王遣小德阿輩臺從數百
人設儀仗鳴鼓角來迎已遣大禮歌多毗從二百餘騎郊
勞比至設宴享甚盛復令使者隨清來貢方物唐長安元
年其王文武立改元大寶遣朝貢人粟田入貢朝臣眞人猶唐
尚書冠進德冠頂有華藻四披紫袍帛帶好學能屬文武后
宴之麟德殿授司膳卿玄宗開元初粟田復來朝請從諸
儒授經詔四門助教趙玄默爲之師獻大幅布爲贄肅宗
上元後海道多爲新羅梗阻乃由明越州入貢德宗建中

初遣大使真人興能獻方物興能善書其紙似繭而澤人莫能名貞元末其王曰桓武遣其學子橋勉勢浮屠空海畱肄業歷二十餘年始歸開成會昌閒數遣僧入唐禮五臺山僖宗光啟元年遣僧宗睿入唐傳教後梁龍德中遣僧來朝後周顯德中其國使又領蝦夷國人來貢人須長四五尺蓋倭之屬國也宋雍熙元年其王守平遣僧齋然獻銅器十餘事竝本國職員今王年代紀各一卷齋然衣綠自號藤原氏善隸書問其風土但書以對太宗聞其國王一姓傳繼文武僚吏皆世官因嘆息謂宰相曰此蓋古之道也賜紫衣存撫甚厚其國有五經書及佛經白居易集七十卷竝得自中夏復求孝經新義大藏經印本皆給之咸平五年建州海賈周世昌與其國人滕木吉至眞宗

召見之試所持木弓竹矢挽射不及遠詰其故以國中不
習戰鬪對自後朝貢來者皆僧也有寂照者識文字繕寫
甚工孝宗淳熙元年倭船火兒毆人至死命械付其綱首
治以其國之法三年風漂日本舟至明州百餘人詔日給
錢米俟本國舟至附歸後屢有漂至華亭定海者詔勿取
其貨如例給養元世祖至元初有高麗人趙彝言日本可
通詔擇可奉使者三年命國信使黑迪殷宏持書往書曰
朕惟自古小國之君境土相接尙務講信修睦況我祖宗
受天明命奄有區夏遐方異域畏威懷德者不可悉數朕
卽位之初以高麗無辜之民久罹鋒鏑卽令罷兵還其疆
域反其旄倪國主感戴來朝義雖君臣歡若父子計王之
君臣亦已知之高麗朕之東藩也日本密邇高麗累代以

來時修職貢獨至朕躬從無一介之使以通和好尙恐王國知之未審故特遣使布告朕心惟王者以四海爲家不相通問豈一家之理哉或至用兵夫孰所好王其圖之

世經

大典云未云不宣白蓋不臣之也

黑迪等道由高麗高麗國王王禘承帝

命遣其臣宋君斐金贊等導詔使往不至而還明年復遣黑迪殷宏至高麗諭以必得日本要領爲期禘遣起居舍人潘阜等再往畱六月亦不得達五年黑迪等逕往至對馬島日本拒不納執其塔二郎彌二郎二人歸明年命高麗金有成送還執者俾中書省牒其國亦不報先是中書平章趙良弼金舊臣也世祖疑其有他志不自安至是請行帝憫其老不許固請乃授祕書監持書以行書曰蓋聞王者無外高麗與朕旣爲一家王國實爲鄰境故嘗馳使

修好孰意疆場之吏抑而弗通所獲二人已敕有司慰撫俾齎牒還國何復寂無所聞繼欲通問屬高麗權臣林衍搆亂坐是弗果豈王亦因此輟不遣使或已遣而中路梗塞邪不然日本素號知禮之國王之君臣寧肯漫爲弗思之事近已滅林衍復舊王位安集其民特命國信使持書至如卽發使與之偕來親仁睦鄰國之善事其或猶豫不決馴至用兵夫誰所樂爲也王其審圖之良弼將行乞定與王相見禮廷議與其國上下之分未定無禮數可言帝從之詔諭高麗送之期必達仍命王國昌洪茶丘將兵三千人衛之海上良弼辭獨與書狀官二十四人俱八年高麗王植遣通事徐稱導送良弼至金津島日本望見使舟輒舉刃相向良弼舍舟登岸宣旨金津守延入板屋環以

遣補陀僧如智等兩奉璽書通好咸以中途有阻而還朕
自臨御以來綏懷屬國薄海內外靡有遐遺日本之好仍
復通問今補陀僧一山道行素高可令往諭附商舶以行
期於必達朕特從其請蓋欲成先皇遺意也至於敦好惜
民之事王其審圖之見典章日本人竟不至十年倭商有慶
抵沿海賈易以金鎧甲爲獻順帝至正中倭屢寇瀕海郡
縣二十三年寇蓬州守將劉暹擊敗之海隅遂安

琉求

琉求亦海中島也

隋宋史寰宇記皆作流求粵志作璠球時未與中國通故紀名各異當建

安郡東水行五日而至

閩州東也

其王歡斯氏自隋時王名渴

刺兜始見於史不知其由來有國年世國人呼王爲可老
羊妻曰多拔茶所居曰波羅檀塹柵三重環以流水樹棘

爲藩中山形勢雄拔境多山洞立四五帥統之洞有小王
邨有鳥了帥以善戰者充一邨刑政皆專焉土無賦斂有
事則均稅用刑無枷鎖縛以繩死刑以鐵錐尺許鑽其頂
殺之俗無文字望月虧盈以紀時候草木榮枯以紀歲人
深目長鼻有小慧男女皆以白紵繩纏髮從頂後遶盤至
額男去髭鬚鳥羽爲冠裝以珠貝簪以赤毛形製不一婦
人黥手爲蟲蛇文以羅紋白布爲帽土產多鬪鏤樹似橘
而葉密條纖如絲下垂織其皮并雜色紵以爲衣綴毛垂
螺爲飾雜色相閒下垂小貝聲如佩環懸珠於頸編藤爲
笠出入必戴有刀稍弓箭劍鉞之屬鐵刃皆薄小以骨角
輔之組紵爲甲或用熊豹皮王所居舍其大十六間出
則乘木獸擡之而行人驍健善走好格鬪耐創而難死收

國死者祭神羣聚食之以鬻體告王王則賜之冠使爲隊
帥王所居壁下多聚鬻體以爲佳土宜稻粱黍豆以石爲
錘火耕水耨氣候與嶺南相類無牛羊驢馬暴海水爲鹽
木汁爲酢釀米麪爲酒會皆用手凡宴會必待呼名而後
飲上王酒亦斥其名歌呼踴躍一唱眾和音頗哀怨嫁娶
以酒肴珠貝爲聘相悅便爲匹偶所產無他奇異故市舶
罕至隋大業三年煬帝令羽騎尉朱寬入海訪求異俗海
帥何鬻言每天清風靜時東望隱約若烟若霧遠不知幾
千里未知何國遂與寬俱往語言不通掠一人并取其
布甲而還時倭國來使見之曰此夷邪久國人所製也明
年遣武賁郎將陳稜等自義安浮海擊之義安今潮州也至高華
嶼又東行二日至鼉鼈嶼又一日至琉求軍中有崑崙人

頗解其語遣慰諭之琉求不從出兵抗拒擊走之入其都
焚宮室俘男女數千人歸歷唐五代皆與中國絕南宋淳
熙間琉求巨豪率數百輩猝至泉州水澳圍頭等邨殺掠
人閉戶則免剽其門圈以去擲以匙筋則頰拾之見鐵騎
爭剽其甲官軍追襲之泅水而遁其境在漳泉福興界與
澎湖諸島相對西南北岸皆水水至澎湖漸低近琉求則
謂之落漈漈者水趨下而不回也凡西岸漁舟到澎湖以
下遇颶風漂流落漈回者百一故其地小而最險元世祖
至元二十八年海船萬戶楊祥請以六千軍往降則受之
不聽命則伐之朝廷從其請命祥爲都元帥將兵抵其國
有書生吳志斗者上言生長福建熟知海道利病若欲收
附琉求且就澎湖發船前往相水勢地利然後興兵未晚

乃命祥充宣撫使志斗假禮部員外郎奉詔以行詔曰朕收撫江南已十七年海外諸番罔不臣屬惟琉求密邇閩境未曾歸附議者請卽加兵朕惟祖宗立法凡不庭之國先遣使招降來則安堵如故否則必致征討今命使宣諭汝國果能慕義來朝存爾國祀保爾黎民若不效順自恃險阻舟師奄及恐貽後悔爾其慎擇之明年三月自汀州尾澳舟行至海洋中東望有山長而低者約去五十里祥指是琉求所在獨乘小舟至低山下見其人眾先令軍官劉閏等二百餘人以小舟載軍器領三嶼人陳輝者登岸眾不解三嶼人語爲其殺使者三人還至澎湖覓志斗蹤跡無有也初志斗嘗斥言祥生事邀功言誕妄難信至是疑祥害之祥顧稱志斗懼誅逃去志斗妻子訴於官有旨

發福建置對後遇赦不竟其事成宗元貞三年福建省平
 章高興言琉求可圖狀遣省都鎮撫張浩新軍萬戶張進
 赴其國禽生口百三十人弗率如故自是終元之世史不
 再見云按琉求上世無攷據其世繼圖云宋淳熙十四年
 不祧祖也在位五十年長子舜馬順熙嗣在位十一年
 祐九年長子義本嗣在位十一年時民苦疾疫多依英祖
 英祖者天孫氏之後也義本遂遜位焉在位四十年開地
 始廣元大德四年英祖子大城嗣在位九年至大二年大
 城次子英慈嗣在位五年延祐元年英慈第四子王城嗣
 在位二十三年時山南北割據稱王琉求始分爲三後
 至元三年王城長子西威嗣在位十四年至正十年察度
 即王位察度者不知所自始其父爲浦添地之按司如中
 國官長之稱也在位四十六年子尚思紹嗣自是以
 尚爲姓而山南王承察度山北王帕尼芝各自爲國

三嶼

三嶼國近琉求世祖至元三十年命選人招誘之平章伯
 顏等言臣等與識者議此國之民不及二百戶時有至泉

州爲商者去年入琉求軍船過其國國人餉以糧倉館我將校無他志也乞不遣使帝從之

安南

安南古稱交趾卽曰南西北自交岡而來故曰交趾

粵志曰南

方夷人足大指開折兩足竝立則前指相交寰宇記謂蠻臥時頭向外足向內而相交故曰交趾又曰交趾足相向也

其地東至於海西界雲南南界占城北界廣西東北界廣東西南界老撾廣一千七百里袤二千八百里其國都之名山曰三峯山安子山繖圓山普賴山盡插入雲漢而大小落靠嶺鬼門關羅婆羅翁嶺麗嶺等皆其阨塞獨倚富良江爲天險江寬二三里水混濁一支自緬甸一支自雲南流入交岡匯珥河蘇歷河勢漸大與林江滄江黃江白藤本凡二江俱注海洋大抵多平原廣野一望畦

田邨莊比里而居人稠地狹亦一都會也粵稽帝顓頊時
南至於交趾莫不砥屬唐堯申命羲叔宅南交平秩南訛
周有越裳氏重三譯來朝秦以其地隸象郡秦亡南海尉
趙佗擊并之漢武帝平南越分其地置交趾九真日南三
郡兼設交趾刺史教以耕種昏娶漸立學校服冠履初治
羸陞光武建武十六年女子徵側反馬援討平之立銅柱
爲界上題銅柱折交趾滅交人歲以沙土擁護焉林邑記云建武
十九年馬援樹兩銅柱於象林南界與西屠國分漢之南
疆又云銅柱山名周十里東臨大海屈膠道里記謂林邑
大浦口有五銅柱按水經注言銅柱在林邑其在欽江
者唐節度馬總所植也山川移易銅柱今復在水中獻
帝建安中改立交州置牧自孫權析交州置廣州始徙交
治龍編卽今安南國都陳隋以來改九真爲愛州日南爲驩州以
兜所流兼設九德新昌諸郡唐高祖武德中改交州總管

府高宗調露元年改安南都護府隸嶺南道安南之名始
此武后大足元年置武安南登二州竝隸府宣宗大中時
交人叛都護高駢復其地改靜海軍授駢節度竝內屬後
梁貞明中始爲土豪曲承美所據末帝授之節鉞轄一十
二州南漢劉隱擅命復伐承美執之并其地尋爲愛州將
楊廷藝所據後州將吳昌岌奪之傳其弟昌文宋太祖乾
德初昌文死其下吳處珩等爭立管內大亂驩州刺史丁
部領與其子璉起兵擊敗處珩等境內以安眾推部領爲
帥自號大勝王署璉爲節度開寶七年遣使朝貢制以璉
充靜海軍節度使安南都護始封部領爲交阯郡王自是
棄爲外域太平興國初璉卒其將黎桓玉海作黎巨幽璉之幼
弟璿自總其眾五年遣蘭州團練使孫全興討之不克雍

熙初數遣使入貢上表求領節鎮授桓安南都護充靜海軍節度使京兆郡侯黎氏遂有其國淳化元年遣使宋鎬王世則至其國既張宴桓跣足持竿入水標魚以娛賓每中一魚左右皆叫譟歡躍已令數十人舉大蛇長數丈饋使館又送二虎備觀玩皆卻不受四年進封桓交阯郡王然時寇邊爲患太宗志在撫寧不問也眞宗御極加封桓南平王自後朝貢不絕景德三年桓卒傳子龍鉞爲其弟龍廷所篡邊將請因亂伐之眞宗不許遣使曉譬威德亂始定四年龍廷入貢遂襲封賜名至忠大中祥符三年至忠爲大校李公蘊所逐自稱畱後遣使貢奉眞宗曰桓不義得國公蘊尤而效之蠻俗不足責遂依故事封公蘊交阯郡王傳子德政及孫日尊神宗熙寧二年表請討占城

俘上僭號大越皇帝改元寶象後曰神武傳子乾德蓋
治大加三道入寇陷欽廉二州招討使郭逵討之旋詣軍
門納款乾德子陽煥孫天祚相繼立孝宗淳熙元年封天
祚爲安南國王安南之稱國始此傳子龍翰卒子吳昂嗣
無子以女昭盛一作昭聖主國事理宗紹定三年昭盛避位於
其夫陳日昃遂有其國李氏傳八世歷二百二十二年而
絕景定三年陳氏表乞紹封詔以日昃爲太王而其子光
昺爲國王元憲宗七年大將兀良合台旣平大理移兵向
交趾三遣使諭降皆不返於是分道進攻師抵洮江遣其
子阿朮往覘虛實交人亦盛陳兵衛兀良合台倍道兼進
軍旣交交人震駭大軍乘之入其郭日昃竄海島得前所
遣三使出之獄以破竹束體入膚比釋縛一使死遂屠其

城雷九日以不耐熱班師更遣二使招日暎來歸日暎還
見國都殘毀大發憤乃縛二使遣還會日暎傳國與子光
景元紹隆遣其壻以方物來見兀良合台送詣行在所
別遣納刺丁往諭之曰昔吾遣使通好爾等執而不返我
是以有去年之師以爾國主播越草野復令二使招安還
國又縛還我使今特再加開諭如果矢心內附則國主親
來猶不悛明以報我光景得書遽納款且曰俟降德音
卽遣子弟爲質世祖中統初以禮部郎中孟甲員外郎李
文俊充正副使持詔往諭略曰祖宗以武功勗業文化未
修朕繼承丕緒鼎新革故務一萬方適聞爾邦有向風慕
義之誠念卿昔在先朝已嘗臣服遠貢方物故頒詔旨諭
爾國官僚士庶凡衣服典禮風俗一依本國舊制已戒邊

將不得擅興兵甲侵爾疆場亂爾人民各宜安治如故光
曷卽遣通侍大夫陳奉公等詣闕獻書願臣附帝封光曷
爲安南國王賜西錦三金熟錦六并授虎符復降詔曰卿
旣委贄爲臣其自中統四年爲始每三年一貢可選儒士
醫人及通陰陽卜筮諸色人匠各三人及蘇合油光香金
銀朱沙沈檀香犀角玳瑁珍珠象牙絲白磁蓋等物同至
仍以納刺丁充達魯花赤往來其國光曷遣員外郎楊安
養等入謝帝賜玉帶繒帛藥餌鞍轡有差至元二年賜光
曷麻竝頒改元詔光曷復遣楊安養上表三通一定所貢
方物二免索儒醫工匠人三願請納刺丁長爲本國達魯
花赤帝許之未幾復下詔諭以六事一君長親朝二子弟
入質三編民數四出軍役五輸賦稅六仍置達魯花赤監

治五年以忽籠海牙代納刺丁爲達魯花赤張庭珍副之
光昺立受詔庭珍責以大義使下拜旣而曰汝朝官爾我
王也何得與抗禮庭珍曰王人雖微序於諸侯之上況天
子命我爲安南之長位居汝上邪光昺語塞中書省復移
牒光昺言其受詔不拜待使介不以王人之禮引春秋之
義責之光昺復書言本國欽奉天朝已封王爵豈非王人
乎天朝奉使復稱王人與之均禮恐辱朝廷況本國前奉
詔旨悉依舊俗凡受詔令奉安正殿而退避別室此本國
舊典也惟閣下察之中書省復移牒切責曰攷之春秋敘
王人於諸侯之上釋例云王人蓋下士也夫五等邦君外
臣之貴者也下士內臣之微者也以微者而加貴者之上
正以王命爲重也後世列王爲爵諸侯之尤貴者顧豈有

以王爵爲人者乎王寧不知而爲是言邪抑辭令之臣誤爲此言邪至於天子之詔人臣當拜受此古今通義乃循舊俗奉安正殿而退避別室王其能自安於心乎前詔所言蓋謂天壤間不啻萬國國各有俗驟使變革有所不便故聽用本俗豈以不拜天子之詔爲從俗哉且王之教令行於國中臣子有受而不拜者則王以爲何如九年以葉式捏爲安南達魯花赤光曷表言微臣僻在海隅得霑聖化與函生驩抃鼓舞乞念臣自降附上國雖奉三年一貢然往來使臣疲於奔命未嘗一日休息至天朝所遣達魯花赤辱臨臣境動有挾持凌轢小國雖天子明竝日月安能照及覆盆且達魯花赤可施於邊蠻小醜臣旣席封爲一方屏藩而反立達魯花赤以監臨之寧不見笑他國伏

望聖慈矜恤凡天朝所遣官乞易爲引進使庶免達魯花赤之擾帝復降旨謂所貢方物無補於用仍以舊制六事

責之光曷遣黎克復文粹上表謝罪乞免

一統志云有李思衍者字克昌

餘十人至元間爲國子司業世祖以安南未附屢遣將攻之不克召思衍副都省參議禿盧奉使招諭及至思衍曰大國之臣不拜小國之君禮也左右爲之失色王笑曰敬其主以及其使亦禮也遂抗禮思衍宣諭威德詞語簡切王大敬之明日奉表款附使甚厚特禿盧受思衍不受既還上勞慰問所驢怒禿盧受思衍曰受者安小國之心不受者全朝廷之體上賢之拜南臺御史又黃常字仲綱樂平人登進士任江州錄事改判梧州朝論以常博雅偉望假禮部侍郎使安南至承天門迎官請下馬常曰奉詔遠來當以禮進安得屈天子使乎馳馬入齊天門王長揖受詔常曰天朝以爾國十年不入貢未一加兵者以世子爲禮義之國乃下此詔亦漢吳王不朝賜几杖之意受詔不拜得無愧乎王亟拜稱謝使還朝論高之

十四年光曷卒國人立其世子日

烜遣中侍大夫周仲彥中亮大夫吳德邵來朝帝遣尙書

柴椿等持詔趣日烜赴闕先是使傳之通也止由鄴闡黎

化閒至是帝命椿自江陵直抵邕州以達交趾椿等至邕州永平寨日烜遣人上書謂近聞國公辱臨敝境邊民無不駭愕不知何國人使椿回牒日禮部尙書等官奉命以事由邕州入爾國所有導護軍兵合乘驛騎宜來界首遠返日烜使御史中贊兼知審刑院事杜國計先至其太尉率百官自富良江岸來迎日烜就館見使者宣詔畢椿謂日汝國內附二十餘年汝父受命爲王汝不請命自立今復不朝異日朝廷加罪將何以逃其責日烜仍舊例設宴於廊下椿等弗就宴旣歸館日烜遣范明字來謝罪改宴集賢殿自言先君棄世子初嗣位天使之來使子憂懼交并竊聞宋主幼小天子憐之尙封公爵於小國亦必加憐若親朝之禮予生長深宮不諳風土恐死於道路俟天

使歸謹上表達誠兼獻異物椿曰宋主年未十歲亦生長深宮如何亦至京師但詔旨之外不敢聞命且我實來召汝非取物也椿等還曰烜遣范明字鄭國瓚杜國計奉表陳情言孤臣稟氣衰弱且道路險遠徒暴白骨致陛下哀傷無益天朝之萬一伏望憐臣得與鰥寡孤獨保其性命以終事陛下此孤臣之至幸小國生靈之大福兼貢馴象二廷議以其飾辭抗命延引歲月宜進兵境上遣官問罪帝不從復遣尙書梁曾再諭曰烜來朝若果不能親至則積金以代其身兩珠以代其目副以賢士方技工匠各二以代其民不則修爾城池以待天兵之至日烜遣其叔遺愛來朝十八年立安南宣慰司以卜顏帖木爾爲使別設僚佐日烜拒弗納詔以光昷旣歿其子不請命自立往召

又以疾辭止令遣愛代覲乃立遣愛爲安南國王以新附軍千人送之國日烜戕殺之二十一年仍遣中大夫陳謙甫貢玉杯金瓶珠條金領及白猿綠鳩等物初鎮南王脫歡奉命征占城遣荆湖行省左丞唐兀解右丞唆都將兵來會帝疑安南通謀占城令軍行假道於其國且責日烜運糧至占城助軍比官軍至衡山縣聞日烜從兄興道王陳峻提兵拒守境上言本國至占城水陸非便願獻糧退軍及至永州移文令日烜除道迎謁已至思明州王復下令督之至祿州聞日烜阻兵亾溫亾急嶺隘路遂分軍兩道竝進遣總把阿里諭以興兵之故實爲占城非爲安南也至急保縣安南兵阻不得前官軍至可離隘遇交兵拒敵與戰敗之至洞板隘又遇交兵戰敗之聞峻在內傍隘

又進兵至變住邨諭其收兵闕路以迎王師不從官軍分六道進攻至萬劫江盡破諸隘峻尙擁船千餘艘距萬劫十里而陣各翼水軍奮勇連戰克捷王與行省官親臨東岸遣兵擊之奪船二十餘艘峻敗走官軍乘閒縛棧爲橋渡富良江日烜沿江立柵布戰具比官軍至卽發礮大呼索戰至晚各進兵日烜棄城遁仍令阮效銳奉書謝罪且請班師大軍旣渡江壁於安南城下明日王入其國都知日烜僭稱大越國主憲天體道大明光孝皇帝陳威晃禪位於太子用昊天成命之寶日烜卽居太上皇位見立國王係日烜之子行紹寶年號所居宮室五門額書大興之門左右掖門正殿九間書天安御殿正南門書朝天閣時交兵棄船登岸者猶眾日烜引宗族官吏於天長長安屯

聚峻復領兵船聚萬劫江口整軍以待會唐兀朮唆都等兵回自占城與大軍合自入其境大小凡七戰略地二千餘里燔皇宮四所分遣右丞寬徹引萬戶忙古朮孛羅哈荅爾由陸路左丞李恆引烏馬爾由水路敗其兵船日烜逃去追至膠海口不知所往唐兀朮言占城無糧軍難久駐王令峻都引本軍於長安就糧日烜至安邦海口棄舟楫甲仗走匿山谷閒官軍獲船萬艘擇善者乘之餘皆焚棄日烜走清化府其弟昭國王陳益稷率本宗秀峻及妻子官吏來降諸將以交人雖數敗散然增兵轉盛我軍暑雨疫作死傷亦眾占城既不可達欲決計退兵脫歡不得已引軍還至如月江日烜遣兵躡其後行至冊江未及渡林箐伏發唆都李恆皆中流矢死官軍力戰始護脫歡得

出境亡者過半此至元二十二年之一敗也事聞帝震怒乃罷征日本兵大舉伐安南下詔暴日烜罪削其位號以益稷自拔來歸封爲安南國王賜符印秀峻爲輔義公歸奉陳祀以兵納之國湖南省臣線哥上言連歲征日本及用兵占城百姓罷於轉輸士卒觸瘴癘多死傷羣臣愁嘆四民廢業今復有事交趾動百萬之眾非所以恤士民也宜寬百姓之力積糧餉繕甲兵俟來歲天時稍利然後大舉未晚詔今歲姑止令益稷暫駐鄂州未幾以阿八赤爲征交趾行省左丞發江淮江西湖廣三省蒙古漢券軍七萬人船五百艘雲南兵六千人海外四州黎兵萬五千人海道萬戶張文虎等運糧十七萬石分道討安南以奧魯赤平章政事烏馬爾樊楫參知政事竝受鎮南王節制日

烜遣中大夫阮文通

本紀作彥

等入貢師次思明州畱兵二千

人以萬戶賀祉張玉統之守韜重令右丞程鵬飛將漢券兵萬人由西道入永平奧魯赤將萬人從王由東道女兒關進楫與烏馬爾帥舟師由海道經玉山雙門安邦口遇交船四百餘擊敗之奪其船鵬飛經老鼠陷沙茨竹三關十七戰皆捷鎮南王進次茅羅港攻浮山寨破之王命鵬飛以兵二萬人守萬劫口且修普賴至靈二山柵命烏馬爾阿八赤合水陸兵徑薄安南城王帥諸軍渡富良江次城下敗其守兵日烜棄城走敢喃堡諸軍攻下之日烜及其子走入海追之不及遣烏馬爾由大滂口返文虎船糧會文虎船至屯山遇交兵殺略相當至綠水洋交船益眾度不支且船膠不可行乃沈米於海而自趨瓊州時官軍

已乏倉分道入山求糧聞交人集兵簡沈簡黎磨山魏寨
發兵大破之王自引兵還萬劫阿八赤將前鋒奪關繫橋
破三江口攻下堡三十二得米十一萬三千餘石烏馬爾
由大滂口趨塔山遇交船千餘擊破之至安邦海口迎文
虎糧船不至復還萬劫得米四萬餘石分兵屯普賴至靈
二山諸將咸言其地無城池可守倉庾可倉且天時已熱
糧且盡宜還師脫歡從其言命楫與烏馬爾由水道先發
鵬飛簡銳卒護王還次內傍關交兵大集賴萬戶張均以
精銳三千人殿力戰出關謀知日烜分兵三十餘萬守女
兒關及丘急嶺連亙百餘里遏歸路諸軍且戰且行交人
乘高發毒矢樊楫張玉阿八赤皆死之脫歡由單已縣志
趨益州間道出次思明州命奧魯赤以諸軍北還

日烜隨遣使入謝且進代身金人贖罪

初用囚首面縛狀後改範立而肅容

者嫌其倨改爲俯伏籍其名於背

并歸所獲俘悉黥其額曰天子兵或曰

投南朝云此至元二十五年之再敗也二十七年日烜卒
子曰燂遣其臣嚴仲羅陳子良等來告哀且請襲爵帝簡
張立道爲禮部侍郎徵其主親朝日燂遣其臣阮代之何
維巖等上表乞赦罪且約來歲詣闕廷議必先朝而後赦
日燂懼卒不至復遣尙書梁曾郎中陳孚再往諭曰汝國
罪愆旣已自陳朕復何言若云畏死道路不敢來朝且有
生之類寧有長久安全者乎天下亦復有不死之地乎朕
所未喻徒以虛文巧飾見欺於義安在日燂復遣陪臣陶
子奇請罪上萬壽頌金冊表廷臣惡其抗命又議興師遂
拘子奇於江陵命劉國傑與諸王亦里吉解等同征安南

分立湖廣安南行省給二印市蜚船百斛者千艘用軍五萬六千五百七十人糧三十五萬石馬料二萬石鹽二十一萬斤預給官軍俸賞軍人水手各鈔二錠水陸分道齎發令益稷隨軍至長沙會世祖崩成宗嗣立命罷征乃遣子奇歸國日燭上表慰國哀竝獻方物遣侍郎李術郎中蕭泰登持詔撫之略曰朕嗣守大統踐阼之始大肆赦宥無閒遠近惟爾安南亦從寬卹已敕有司罷兵自今以往所以畏天事大者其審思之大德三年丞相完澤等奏安南來使鄧汝霖竊畫宮苑圖本私買輿地圖及禁書且私記北邊軍情山陵諸事宐責以大義遣尙書馬合馬侍郎喬宗亮諭以汝霖等所爲不法理宐窮治朕惟天下爲度敕有司放還自今使介必須選擇有所陳請必盡情愜向

以虛文見給曾何益於事哉勿憚改圖致貽後悔武宗初立頒卽位詔曰惟我國家以武功定天下文德懷遠人乃眷安南自乃祖乃父世修方貢朕甚嘉之邇者先皇晏駕朕方撫軍朔方爲宗戚元勳所推戴謂朕乃世祖嫡孫裕皇正派宗藩效順於外臣民屬望於下人心所共神器有歸朕俯徇輿情已於上都卽位今遣尙書阿里灰諭旨尙體同仁之視益堅事大之誠輯寧爾邦以稱朕意仁宗繼統世子陳日套遣使來朝頒改元詔曰惟我祖宗受天明命撫有萬邦威德所加柔遠能邇乃者先帝龍馭上賓朕以王侯臣民不釋之故已卽位於大都其以明年爲皇慶元年今遣尙書乃馬台齋詔宣諭仍頒新厯一本卿其敬授人時益修臣職毋替爾祖事大之誠以副朕不忘柔遠

之意

俱見典章

皇慶二年交軍三萬餘眾突犯鎮安州復分兵

犯歸順州屯聚未退其世子復親領兵陷養利州聲言知

州事趙珏禽我思浪州商人取金一礮侵田千餘頃故來

警殺樞密院俾千戶劉元亨赴湖廣詢察元亨親詣上中

下由邨相視地所牒諭安南國曰昔漢置九郡唐立五管

安南實聲教所及之地況獻圖奉貢上下之分素明厚往

薄來懷撫之惠亦至聖朝果何負於貴國今何自作不靖

狡焉啟疆雖由邨之地所繫至微而國家輿圖所關甚大

兼之殺掠者皆朝廷屬籍編戶省院未敢奏聞然未審不

軌之謀誰實主之安南回牒云邊鄙鼠竊輩自作不靖本

國安得而知且以重賂至元亨復牒責以飾辭不實卻其

賂且曰南金象齒貴國以爲寶而使以不貪爲寶請審

察事情明以告我而道里遼遠情詞虛誕終莫得其要領
元亨上言曩者交人嘗侵永平邊境今復倣效成風爲今
之計莫若遣官宣諭歸我土田返我人民仍令當國之人
正其疆界究其首謀開釁之人戮於境上申飭邊吏毋令
侵越更於永平置寨募兵設官統領給田土牛具令自耕
會編立部伍明示賞罰令其緩急首尾相應如此則邊境
安靜永保無虞事聞得旨俟安南使至敕之延祐三年命
湖廣行省諭安南歸占城國王此本紀之文舊傳及占城傳皆不載英宗至
治初遣尙書教化頒登極詔泰定帝卽位詔安南國世子
陳日熿曰我國家誕膺景命撫綏萬邦德澤普加靡聞華
夏乃者先朝奄棄臣民朕以裕皇嫡孫爲宗室大臣推戴
爰自太祖肇基之地入承天敘其以甲子歲爲泰定元年

今遣尙書馬合謀齎詔播告賜爾授時麻一帙惟乃祖乃父修貢內附有年矣我國家遇卿良厚以占城守臣上表稱卿之邊吏累發兵相侵朕爲惻然於中不知卿何爲至是豈信然邪朕君臨天下視遠猶邇務輯寧其民俾各得所卿其體朕至懷戒飭士眾慎保乂民俾毋忘爾累世忠順之意

見元文類
曹元用撰

日曠遣陪臣莫節夫入賀二年寧遠知

州添插言安南土官押那攻掠其本末諸寨敕押那歸其俘三年安南國阮叩寇思州路命湖廣行省飭兵備之先是陳益稷久居鄂州遙授湖廣行省平章其妻子皆爲本國所害當成宗朝賜漢陽田五百頃俾自贍旣而奪之武宗憫其老重加恩命制曰委贄歸朝旣去逆而效順以爵馭貴宜崇德而報功誕播明綸用孚眾聽爾陳益稷知畏

天者事大期保境以安民慕帝王之有真見幾而作懼祖宗之不祀自拔而來以忠孝之誠受知於世皇蒙天地之德錫封於故國始者周王之赫怒伐罪弔民終焉堯舜之誕敷班師振旅彼迷不復爾守彌堅拯溺救焚從王師凡一再舉授餐適館畱湖右幾三十年身歷事於四朝志不渝乎初節肆朕卽阼亟其來庭是用加新秩以示恩仍舊封而授職於戲內寧外撫朕不忘銅柱之南近悅遠來爾益拱星辰之北對揚休命永堅一心可加金紫光祿大夫安南國王給田如故

見元文類程鉅夫撰

文宗天曆二年卒壽七十

有六賜錢五千緡諡忠懿三年世子陳日焯遣其臣鄧世延等二十四人來貢至順元年有廣源賊閉覆寇龍州羅回洞龍州萬戶移文詰安南其國回言自歸天朝恪其臣

職彼疆此界盡屬一統豈以羅回原隸本國遂起爭端此蓋邊吏生釁假閉覆爲名爾理宜卽加窮治命龍州萬戶仍還所掠次年日焯遣其臣段子貞來貢順帝元統二年遣尙書帖住等使交趾以授時厯賜之後至元元年封其世子陳端午爲國王按其國制度分十三道五十二府二百一十九州縣其實一道不及中國一小郡所至皆設學校惟諒山有城甌色紅紫相傳爲馬伏波所築王宮用黃瓦簷高不過丈民房以草苫覆門僅三尺許俯首出入文字與中土同外別作數十字多加土傍以示異亦止行於國中其物產多稻無麥重蠶桑有紬布不植棉花所在竹木成林蔽天日其用人內設閣部卿寺翰苑科道等官獨御史臺職取重外設承政憲司擬藩臬郡縣各有正佐俱

按出身非甲科不得膺京官要職武臣內有武軍都督府

各領一軍不相統屬外有提督畱守多以世襲五等爵充

之文人頗嗜書弄柔翰每三年一大比初試經義次試四

六三試詩四試策各道取中三場者曰生徒即生員中四場

者曰貢生即孝廉至會試中四場者曰進士無定額其氏族

如阮裴吳楊陶黃武宋陳程梁胡之屬外無他姓男女皆

披髮以香蠟斂之不令散亂地皆淨沙雖跣足無垢以藥

塗其齒使之黑而有光無陰晴俱戴笠見貴人長者則以

脫笠爲敬衣大領衣色尙白不著裏裳稱貴人曰翁茶言

大官也倉生肉不設几席其桌圍高僅尺許豪家始有牀

褥平民率藉草而臥好怪異尙巫鬼不奉二氏教婚姻富

貴家用媒妁遵禮制貧人男女相悅卽備錢貫成夫婦雖

同姓不避獨喪祭各依古禮信堪輿禁官民不得卜地止許葬田中惟國王始擇地於山上兵無甲冑止用火器長刀標鎗藤牌之屬臨陣以象爲重其時候夏月更熱男女悉避暑水中草木四時不凋晝夜無長短古所稱曰南者殆不虛與

占城

占城古越裳氏界本秦象郡林邑縣地漢爲象林縣屬曰南郡東濱海西際暹羅南通真臘北與安南之驩州接壤東西五百里而羸南北三千里城去海百二十里近瓊州舟行順風一日可至其南曰施備州西曰上源州北曰烏里州所統大小州凡三十有八亦有縣鎮諸名漢末大亂縣功曹姓區有子曰連殺縣令自號爲王謂之林邑國吳

大帝赤烏時曾與中國通數傳無嗣其甥范熊代立傳子逸晉成帝咸康二年逸死夷奴范文纂位都典沖去海岸四十里時交州刺史姜莊使所親監日南郡竝貪殘臺遣夏侯覽爲太守尤侵刻文貪日南肥沃欲略有之至是因民之怨襲殺覽交州刺史朱藩遣督護戍日南文復滅之穆帝永和五年文死子佛立猶屯日南七年交州刺史楊平九真太守灌遂討佛走之佛請降安帝隆安三年佛孫胡達復寇日南九真諸郡殺傷甚眾交州漸削弱至其孫文敵爲扶南王子當根純所殺大臣范諸農平其亂自立爲王諸農死子楊邁立楊邁死子咄立劉宋元嘉二十年使振武將軍宗慤與交州刺史檀和之討之其後遣使朝貢齊梁陳時或不賓服隋遣大將軍劉方及欽州刺史甯

長真伐之其王梵志遣使謝罪於是朝貢踵至唐太宗貞觀中其王頭黎死子鎮龍被弑頭黎女自立爲王國人不服其立頭黎之姑子諸葛地爲王妻以女其國大定肅宗至德後以其國在環州界更號環王王所居占城又以占城名之黃巢亂後嶺海多故史亦絕書後周顯德五年其王舍利因德漫來入貢用貝多葉書表香木函盛之始自稱占城國宋太祖建隆三年其王舍利因陀盤遣使朝貢開寶五年其王波美稅褐印茶遣使蒲訶散朝貢卽前二次所遣者也太平興國二年其王波美稅陽布印茶遣使李牌來貢七年獻馴象詔畱廣州畜之雍熙二年其王舍利陀盤吳日歡遣使來獻方物且訴爲交人黎桓侵掠三年其王劉繼宗遣使李朝仙來貢淳化元年新王楊陀排

自稱新坐佛逝國詠爲交州所攻上降詔令各守邊境尋
賜其王白馬兵器諸番聞之不敢侮至道元年上表謝恩
眞宗咸平二年嗣王楊普俱毗茶舍利貢使再至詢知其
避交人奔佛逝去舊都七百里大中祥符三年嗣王舍利
霞離鼻麻底得金毛師子於三佛齊國來獻仁宗天聖七
年嗣王尸嘿排摩懽上表進鳳八年嗣王楊補孤施離皮
入貢嘉祐元年其使蒲息陀琶貢方物還至太平州沈失
行橐詔廣州賜銀千兩七年其王舍利律茶盤麻與交阯
方構兵改由廣東路入貢神宗熙寧元年其王楊卜舍利
律陀般摩提婆乞市馬令於廣州買騾以歸哲宗元祐中
表言如討交阯願效力優詔荅之高宗建炎三年其王楊
卜麻屋遣使入貢紹興二十五年其子鄒時闌巴嗣立孝

宗乾道三年子鄒亞那嗣掠大倉國方物來獻爲大倉所
訴遂不議封淳熙中占城以舟師襲真臘入其國都寧宗
慶元五年真臘大舉復仇殺戮殆盡俘其主以歸國遂亡
其地悉歸真臘因名占臘其後國王或曰真臘人又曰占
城恢復無可據者元至元十五年世祖旣平宋將有事海
外時荆湖行省左丞唆都遣人至占城還言其王舍利咱
牙信合八刺麻哈迭瓦願內附詔封占城郡王本紀作十
八年十月
事遣侍郎教化迪總管孟慶元萬戶孫勝夫與唆都同往
諭其王來朝十七年國王保寶旦拏囉耶印南謁占巴地
囉耶遣使奉表降兼貢珍物及犀象初朝廷以占城國王
李山補刺者吾稱臣內附命唆都就其國立占城行省撫
之旣而其子補的專國負固弗率會萬戶何子志千戶皇

甫傑使暹羅宣慰使尤承賢亞蘭等使馬八兒國道經占
城皆被執於是興師討之兵出廣州航海至占城港港口
北連海旁有小港五通其國大州東南止山西傍木城官
軍依海岸屯駐蠻兵治木城四面約二十餘里起樓棚立
礮百餘座又木城西十里建行宮其國王親率重兵屯守
行省遣都鎮撫李天祐沼之七往終不服分遣瓊州安撫
使陳仲達以兵由水路攻木城北面總把張斌百戶趙達
攻東面沙觜省官分二道攻南面舟行至天明泊岸爲風
濤所碎者十七八蠻兵開木城南門建旗鼓乘象迎敵戰
良久敗之官軍入木城復與東北二軍合擊之其王棄行
宮燒倉廩殺承賢亞蘭等與其臣逃入山谷使報答者陽
乞降許之官軍入大州王遣其舅寶脫禿花奉國王信物

雜布二百匹大銀三錠小銀五十七錠碎銀一甕爲質又
獻金葉九節標槍言國王欲來病未能起先使持其槍來
以見誠意復令第四子利世麻八都八德刺第五子舍利
印德刺來見詭言世子補的被傷死王頰中箭未愈故先
遣二子來議赴闕親覲事以款我師省官疑其非真子聽
其還遣千戶林子全偕往覘之二子在途先歸子全入山
兩程國王遣人來拒不果見又殺何子志皇甫傑等百餘
人寶脫禿花俄又至自言我祖父伯叔皆爲國主傳至我
兄今孛由補刺者吾殺而奪其位我寶銜之願禽其父子
以獻請給大元服色唆都不虞其詐賜衣冠撫諭而行有
居占城唐人曾延者來言國王逃於大州西北鴉候山聚
兵約二萬餘且詣交阯眞臘閩婆諸國借兵未至懼唐人

洩其事將盡殺之延等覺而逃來未幾寶脫禿花偕其宰相報孫達爾及撮及大師等五人來降省官引曾延與見寶脫禿花曰此姦細人也國軍皆潰散安敢復戰且今未附州郡凡十二處每州遣一人招之無不服者唆都猶信其言遣子全等領軍同赴大州比至城西寶脫禿花背約間行自北門乘象去遣萬戶張顥等領兵赴國王所棲之地顥兵近木城二十里蠻兵浚濠塹拒以大木官軍斬刈超距奮擊轉戰至木城下山林阻隘不能前蠻兵旁出截歸路軍殊死戰得脫乃整伍聚糧勸木城守之朝廷更命阿塔海發兵萬五千人船二百艘助征以安南道阻不果至又命萬戶忽都虎烏馬兒率江淮軍二萬人赴唆都軍前而唆都已回軍忽都虎等至占城知官軍已還令百戶

陳奎招其國王來降其王遣阿不蘭納款具言其國被官軍掃蕩貧無以獻俟來年當備物令嫡子入朝未幾果遣其孫濟日理勒蟄奉表歸順朝廷未知也再命鎮南王脫歡發兵假道交阯征之國王乞回軍願出土產歲修職貢使大盤亞羅日加翳大巴南等十一人詣闕獻馴象竝賀聖誕節舊州主寶嘉婁亦奉表入附自是終元之世貢使不絕英宗至治三年遣其弟保祐入刺遮貢方物泰定帝致和元年遣使來貢兼言屢爲交阯所侵帝下詔和解文宗至順三年遣其臣阿南那那里沙等奉金書表入貢順帝後至元元年遣使獻方物且言交阯遏其貢道詔遣使開諭其所貢雲龍形通犀帶菩薩石薺薇水猛火油

歲香不敬油得水
愈滅水戰則用之

皆貯琉璃餅中以進有火珠大如雞卵
衣經

日正午承影取艾燃之火見其王每坐見官屬一膜拜卽起白事事畢復一膜拜而退親近之臣見王行跪踈遠者拱手而已王腦後髻髻散垂披吉貝衣或大倉錦或用法錦大衫戴金花冠七寶裝纓珞爲飾脛股皆露躡革履無襪男子以白麤布纏胷下垂至足衣袖窄甚撮髮爲髻散垂餘髻於後婦人亦腦後撮髻無笄梳其服飾與男子同人多乘象倉山羊水兕國無城郭無絲蠶有米粟豆麻每歲稻熟王自刈一把從者及羣婦女競割終畝其王或以兄爲副王或以弟爲次王設高官八員分掌東西南北各二無奉祿所管土俗資給之別置文吏五十員有郎中員外秀才等分管資儲寶貨又司帑廩者十二員主軍卒者二百餘員皆給龜魚以充倉免其調役而止其大姓號婆

羅門兵萬餘人月給秬米二斛歲給布三五匹王乘木杠
四人舁之從者十餘輩一人執檳榔杵合前導樂有胡琴
笛鼓大鼓樂部亦列舞人兵器則刀槍弓矢手牌夜臥惟
王有牀諸臣則施地蓐以十一月十五日爲冬至相賀十
二月十五日祀天縛木爲塔王及人民用衣物香藥焚其
上州縣各以土產物帛獻王有孔雀玳瑁山雞龍腦夾箋
沈香胡椒豆蔻丁香乳香黃
蠟紫礦琉璃珊瑚草澄茄西天烽鐵
蘇木烏楠木白藤白氎布貝多葉簞人有疾病采生藥服
倉地不產茶飲椰子酒刑小過以藤杖當死者梭槍挾其
喉或令象踏之或以鼻捲撲象皆馴習隨人意世與安南
相惡數攻殺兩國使者竝至則分東西賜宴朝則交人入
垂拱殿占城人趨紫宸以避若誓不相見者

暹
羅斛

暹與羅斛古之扶南國也暹國北與雲南徼外八百媳婦
接壤東界安南西北距緬羅斛在暹之南濱大海暹土瘠
不宜稼羅斛地平行種多穫暹仰給焉有大河自暹達於
羅斛東南入海南史扶南有大江廣十里從西流東入海卽此每夏有黃水自海
港漲入內河農民乘時櫂舟播種苗隨水以漸而長水尺
苗尺水丈苗丈水退苗熟有播植無耕耘故穀豐而賤甲
乎南海晉書扶南國西去林邑三千餘里在海大灣中其
境廣袤三千里人以耕種爲務一歲種三歲穫是也歷晉
宋齊梁隋唐屢通貢獻後分爲暹羅斛二國世祖至元二
十六年羅斛遣使入貢成宗元貞初暹國進金葉表暹人
與麻里子兒舊相讐殺至是皆歸順英宗至治三年暹國
來貢順帝至正閒暹始降於羅斛因合爲暹羅國暹羅南

境斗入大海中形如箕舌延袤約三千里遶出占城真臘之西南隔海相望海水沿此成一大灣故梁書及南史竝以扶南在日南郡之南海西大灣中云梁書扶南之南叻在海崎上地方千里城去海十里有五王竝稱屬扶南頓暹東通交州西接天竺徼外諸國往還交市頓暹迴入海中千餘里漲海無崖岸船舶未嘗得徑過也今西夷商舶東來者必遶出其南而後東北趨粵海其地爲中國南洋海與印度小西洋海之一分劃海道之扼要也明以後爲滿刺加彭亨各國竝服屬暹羅

八百媳婦

八百媳婦者夷名景邁世傳其長有妻八百各領一寨故名八百媳婦國自古不通聲教元世祖中統初命將征之道遠未達而還後遣使招附置八百大甸軍民宣慰司有大小徹里者本古產里伊尹四方獻令曰產里以象齒短狗獻周公作指南車導之歸故名車里後譌爲徹里其地

在元江南與八百媳婦犬牙相錯成宗元貞二年大徹里

胡念來降立徹里軍民總管府已置耿東路耿當孟弄二

州大德元年八百媳婦叛寇徹里遣野先不花討之不克

四年用雲南右丞劉深計發兵二萬立征八百媳婦萬戶

府二出四川雲南囚徒從軍人給貳子六十索深等將兵

取道順元路督雲南調民供給土官宋隆濟

滇志云隆濟本宋寧遠節

度宋景陽之後給其眾曰官軍徵發汝等將盡剪髮黥面爲兵身

死行陣妻子爲掠勢所必至眾惑其言遂反深復脅水西

土官之妻蛇節出金三千兩馬三千疋蛇節不能堪聯結

隆濟率苗獠紫江諸蠻圍深窮谷中攻破楊黃寨殺掠甚

眾朝命陝西平章耶速帶阿湖廣平章劉國傑將兵合討

之大敗隆濟兵於墨特川其兄子順元路同知阿重縛之

來獻蛇節亦乞降竝斬之深坐棄市於是罷所置萬戶府
畱蛇節養子阿闕于本境以撫其民而升阿重爲宣撫使
武宗至大二年八百媳婦與大小徹里競作亂威遠州土
官谷保奪據木羅甸遣雲南右丞算只爾威招之私受谷
保賂竟以敗還仁宗皇慶初八百媳婦再寇邊帝降詔招
撫之始獻馴象白象繼遣其子招三聽來朝時大徹里哀
用亦遣貢使七十五人詣闕賜裘帽鞞鞞有差泰定二年
以土人塞賽爲徹里軍民府總管滇志云初徹里總管塞
江判官度宗顯所誣朝廷遣兵討之失利繼遣都元帥述
律杰曉以大義塞賽感悟願增差賦并出黃金采女遺之
一無所受塞賽日入我土而不四年八百媳婦請官守置
爲金婦餌者元帥一人而已蒙慶宣慰司都元帥府及木安孟傑二府于其地文宗嗣
位八百媳婦使者昭哀入貢其地東至老撾界南至波勒

蠻界西至大古刺界北至孟良府界自姚關東南行五十
程至其國有南格刺山下有河南屬八百北屬車里平川
數千里轄步廣遠其產巨象安息白檀諸香民皆焚種刺
花樣於眉目間卽古所謂雕題也好佛惡殺每邨卅一寺
每寺建一塔約以萬計有敵人來侵不得已舉兵得其讐
而止俗名慈悲國云

緬

緬國爲西南夷不知何種其地有接大理及去成都遠
者又不知其方幾里前史皆不載相傳有城郭屋廡以居
有象馬以乘舟筏以濟其文字進上者用金葉寫之次用
紙又次用檳榔葉謂之緬書蓋臆譯而後通元世祖至元
八年大理宣慰司遣乞解脫因等至緬招之導其使价博

者借來十年二月再遣勘馬刺失里充國信使持詔諭之
曰聞者大理善闡等路宣慰司導王國使詣京師且言歸
至王國但見其臣下未得見王又欲觀吾大國舍利朕矜
憫遠來即使來使覲見又令縱觀舍利益詢其所來乃知
王有內附意國雖云遠一視同仁今再遣使往諭王國誠
能謹事大之禮當遣子弟大臣來朝彰我國家無外之義
用敦永好時乃之休至若用兵夫誰所好王其思之不報
雲南行省請討之帝曰姑緩十二年建寧路安撫使賀天
爵言得金齒頭曰阿郭言知入緬有三道一由天部馬一
由驟甸一由阿郭地界俱會緬之江頭城又阿郭所親阿
提範在緬掌五甸戶各萬餘欲內屬請用爲引道旣而金
齒干額總管阿禾來附具言國使前爲蒲賊阻道今蒲人

多降國使已達緬緬王初無降心故畱之不遣無何緬人以阿禾內附怨之攻其地欲立砮騰越永昌間時萬戶忽都總管信苴日總把脫羅脫孩方奉命伐永昌之西騰越蒲驃阿昌金齒未降諸部族駐師南甸阿禾來告急忽都等遂晝夜行與緬軍遇一河邊其眾約四五萬忽都等軍僅七百人緬人前乘馬次象次步卒忽都下令賊眾我寡當先衝河北軍親率二百八十一騎爲一隊信苴日以二百三十三騎傍河爲一隊脫羅脫孩以一百八十七人依山爲一隊戰良久蠻兵敗走忽南面蠻兵萬餘遶出官軍後忽都復列爲三陣進至河岸擊之又敗走連破十七砮逐北至窄山口蠻兵及象馬自相蹂死日暮忽都中傷始收兵明日追之至干額不及而還其脫者又爲阿禾阿昌

邀殺歸者無幾時十四年三月事也十月雲南宣慰使都元帥納速刺丁率蒙古翥焚摩些軍三千八百人再征之至江頭城招降磨欲等三百餘寨土官曲臘蒲折戶四千孟磨愛呂戶一千磨柰蒙匡里答八刺戶二萬蒙忙甸土官甫祿保戶一萬木都彈岡戶二百凡三萬五千二百戶以天熱班師二十年王師伐緬克之先是帝聽納速刺丁言發四川軍萬人命藥刺海領之既僉思播敘三州軍及亦奚不薛諸蠻兵征緬不果行至是詔宗王相吾答爾右丞太卜參政耶罕的斤將兵征之大軍發中慶至南甸太卜由羅碧甸進軍王命耶罕的斤取道阿昔江達鎮西阿禾江造舟二百艘順流至江頭城斷緬人水路自將一軍從驃甸徑抵其國與太卜軍會令諸將分地攻取破其江

頭城遣人說降緬王不應進攻建都太公城擄其巢建都及金齒十二部俱降王遣使入緬得珍珠珊瑚異綵七寶束帶亡算二十二年緬王遣其鹽井大官阿必立相至太公城謀納款爲孟乃甸白衣頭目解塞阻道不得行遣騰馬宅來告乞降旨許其悔過後差大官赴闕朝廷尋遣鎮西平緬招討使怯烈詣其國宣上威德旣而以張萬爲征緬副都元帥耶先鐵木兒爲征緬招討使敕造戰船將兵六千人俾圖滿帶爲都元帥總之由中慶抵永昌經阿昔甸已至忙乃甸緬王爲其庶子不速速古里所執囚於昔里怯答刺之地與大官木浪周等爲逆雲南王所命官阿難答等亦遇害帝決意再征之以脫滿答爾爲都元帥李海刺孫爲征緬行省參政將新附軍五千探馬赤一千以

行仍調四川湖廣軍五千赴之募能通白夷金齒道路者從征令駐緬近郊俟進止既而雲南王與諸將進征至蒲甘緬人誘使深入喪師七千餘緬使謝罪歸款以其地處滇南極邊就其渠長爲帥定三歲一貢二十六年始遣委馬刺菩提班的來進方物成宗元貞元年緬國阿刺札高微班的來獻舍利二年遣子僧伽巴叔撒邦巴來貢大德元年緬王請歲輸銀二千五百兩帛千匹馴象二十糧萬石始封其主的立普哇拿阿迪提牙爲緬國王賜銀印子信哈八的爲緬國世子賜虎符又賜王弟撒邦巴一珠虎符頭令阿撒三珠虎符遣之踰年復遣其世子奉表入謝自陳部民爲金齒殺掠率皆貧乏以致上貢金幣愆期帝憫之止命閒歲貢象仍賜衣遣還四年緬王爲其弟阿散

哥耶所殺其子窟麻刺哥撒八逃詣京師令忙兀圖魯迷失率師問罪蠻賊與八百媳婦通勢張甚更命雲南平章薛超兀爾等益兵萬二千人赴之詔立窟麻刺哥撒八爲王初雲南參政高慶宣撫使察罕不花從薛超兀爾圍緬兩月城中食盡將出降慶等受其賂以炎暑瘴疫爲辭首倡還計以致師出無功詔誅之并奪薛超兀爾官武宗至大元年緬使貢白象帝命朵爾只爲兵部侍郎至其國仁宗延祐二年遣其子脫刺合來朝六年復遣其臣趙欽撒入貢英宗至治元年帝御大明殿受緬國使者朝泰定元年緬國王子吾者那等爭立歲貢不至命雲南省宣諭之三年緬國王答里耶伯以國亂來乞師詔雲南就近安撫之四年答里必牙請復立行省於迷郎崇城不允文宗至

順三年遣使者阿落等十人奉獻方物順帝後至元四年
緬國來貢立邦牙等處宣慰司都元帥府并總管府其疆
域東至八百宣慰司界南至海西至孟養界北至猛密宣
撫司界自司東北三十八程至雲南省治其山曰小豹其
江曰金沙江闊水惡緬人恃以爲險其俗柔詐慄悍男子
善浮水縮髻頂前用青白布纏之婦人縮髻頂後不施脂
粉事佛敬僧有大事則抱佛說誓或詣僧誓之然後決其
產象犀馬椰子白氎布兜羅絛樹類樓高五六丈結實如
掌土人以麩納罐中以索懸罐於實下劃實取汁熬爲白
糖其葉卽貝葉寫緬書用之石油自石縫流出臭惡而黑
色可塗瘡都會有江頭城至騰衝十五日太公城在江頭
城南十日馬來城在太公城南八日安正國城在馬來城

南五日蒲甘緬王城在安正國城西南五日所謂緬中五城也

瓜哇

瓜哇在南海中直占城西南與唐之婆羅宋之淳泥同島

此曰大瓜哇別有小瓜哇者古之詞陵也亦曰閩婆其島更在大瓜哇之西南今日葛雷巴島

自泉南登

舟海行者先至占城而後抵其國風俗土產不可攷元世祖撫有四夷其出師海外諸番者惟瓜哇之役最大自至元十七年始降旨招諭其國二十三年遣必刺蠻等至瓜哇自是通使往來無間後遣孟右丞持詔往國主刺其面遣歸帝怒決意伐之二十九年二月詔史弼高興亦黑迷失竝爲福建行省平章會福建江西湖廣三省兵凡二萬發海舟千艘齎糧一年降虎符金符銀符以百計用備功

賞十一月大軍會泉州十二月自後渚啟行風急濤涌舟
掀簸士卒數日不能會過七洲洋萬里石塘歷交阯占城
界明年正月至東董西董由牛崎嶼入混沌大洋橄欖嶼
假里馬答句欄等山駐兵伐木造小船以入遣宣撫官楊
梓全忠祖等率五百餘人先往招諭二月大軍繼進于吉
利門弼等至瓜哇之杜竝足議分軍水陸進攻弼率都元
帥那海等水軍自杜竝足過戎牙港口至八節潤興與亦
黑迷失帥馬步軍自杜竝足陸行遣副元帥土虎登哥等
乘鑽鋒船由戎牙路至麻喏巴歇之浮橋時瓜哇方與鄰
國葛郎構怨其王爲葛郎主哈只葛當所殺其壻土罕必
闍耶攻葛郎不勝退保麻喏巴歇聞弼等至以其國山川
戶口并獻葛郎國地圖納降先令楊梓全忠祖引其宰相

昔刺難答吒耶等五十餘人來迎三月一日大軍會於八節澗澗上接杜馬班王府下通莆奔大海乃瓜哇咽喉必爭之地其謀臣希寧官沿河泊舟楫觀望成敗再三招之不降乃於澗邊設偃月營畱萬戶王天祥守河津土虎登哥等水陸齊發希寧官懼棄船宵遁獲鬼頭大船百餘艘令都元帥那海等鎮八節澗海口大軍方行土罕必閣耶遣使詐稱葛郎主追殺至麻喏巴歇乞官軍救援亦黑迷失信其說先遣都元帥鄭鎮國引軍赴章孤援之興軍抵麻喏巴歇卻稱葛郎兵未知遠近興回至八節澗尋報賊兵夜當至興仍赴麻喏巴歇未幾葛郎兵果三路來攻亦黑迷失率萬戶李明迎賊於西南不遇興與萬戶脫歡由東南路接戰殺傷數百人餘賊奔潰山谷俄西南路賊奄

至興再戰至晡又敗之乃分軍三道伐葛郎土虎登哥將水軍沂流而上亦黑迷失由西道興等由東道士罕必闍耶以本軍繼其後期會答哈城葛郎國主將兵十餘萬拒敵三戰蠻兵敗潰擁入河死者亡算進圍其城是夕哈只葛當出降竝俘其妻子土罕必闍耶求歸具降表兼貢所藏珍器遣萬戶捏只不丁甘周不花率兵護送之至中途殺二使叛去且合眾來攻四月大軍引還弼等且戰且行行三百里得登舟行六十八日夜達泉州士卒亡者三千餘人帝怒弼等玩寇無功各杖恥之成宗大德元年瓜哇國遣舍刺班直木達奉表乞降始授宣敕元貞元年來獻方物仁英兩朝皆遣使賀天壽節泰定二年亦奉表入貢致和元年詔優護瓜哇國主札牙納哥仍賜衣物弓矢文

宗至順三年遣其臣僧伽刺等奉金書表以獻順帝至正二十三年遣使澹濛加伽殿來進方物帝賜其主三珠虎符及織錦文幣按宋史云闍婆國四面皆水西北汎海歷淳泥三佛齊等國計程一月餘可至柴歷亭抵交阯達廣州其地平坦宜稻麻粟豆不產茶煮海爲鹽出金銀犀牙笏檀香苟香亦務蠶織室宇壯麗多飾金碧翦銀葉爲錢其酒出蝦蟇丹樹甚香美其俗有名而無姓王則椎髻戴金鈴衣錦袍躡革履坐方牀官吏入謁三拜而退國人見王出則坐俟其過乃起以爲敬以王子三人爲副王先是劉宋元嘉十二年曾遣使朝貢後罕與中國通唐書訶陵亦曰闍婆其先世曾遷於婆露伽斯城後王復居闍婆城貞觀大祿元和閒屢入貢宋太宗淳化三年其主穆羅茶

遣使陀湛等來貢象牙真珠繡花銷金及繡絲絞雜色絲
絞吉貝織雜色絞布七寶飾檀香亭子帝賜金幣甚厚高

宗建炎三年制授其主閻婆國王相傳以為即瓜哇之故

名云大政紀載洪武二年遣行人吳用賜瓜哇國王書有云國人晚只母丁奉使於元還至福建而元亡因來

居京師故特遣人送還粵志云佛書所謂鬼國即此地也其港口入去馬頭曰新邨屋宇商賈甚眾後并三佛齊

國名舊港以別於新邨

馬八兒 俱蘭

海外諸番惟馬八兒與俱蘭足為綱領而俱蘭又為馬八

兒後障自泉州至其國約二萬餘里其國至阿不合大王

城水路得便風約十五日可到阿不合世系表作阿八哈八不雙聲憲宗時皇弟

旭烈兀平西域因王之波斯子阿不合嗣封世祖至元十

年詔遣札朮阿等持金十萬兩命諸王阿不合市藥師子國益以其地相距近也師子國即今南印度海中錫蘭山一名僧伽那山古狼牙修國也阿不合之孫曰合贊舊史

成宗紀大德八年諸王合贊遣使自西域來貢是已黃潘

海通千戶楊樞墓志大德五年樞浮海至西洋遇親王合

贊使臣那懷等如京師遂載之以來那懷等朝貢畢請仍

以樞護送西還八年發京師十一年乃至其登陸處曰忽

魯謨思云職方外紀阿爾謨海與西紅海相對共兩海以

阿爾謨即忽魯謨之譯音海以地名也一日波斯灣環波

斯西南又東南注印度大洋海忽魯謨斯當波斯灣海口

其南有小島故職方外紀又指此島爲忽魯謨思焉俱蘭

至阿不台大王城水路得使風十五日可到則馬八世祖

兒俱蘭二國距波斯不遠波斯一日報達又名巴社

至元間行省左丞唆都等奉聖書十通招諭諸番未幾占

城馬八兒俱奉表稱藩惟俱蘭未下十六年十二月遣廣

東招討使楊庭璧招之十七年三月至其國國主必納的

令其弟宵那卻不刺本省書回回字降表附進約來歲入

貢尋授哈撒爾海牙爲俱藍宣慰使偕庭璧再往十八年

正月自泉州入海復行三月抵僧伽耶山耶爲那之謫一作僧伽刺大唐

西域記作僧伽羅今日錫蘭山舟人以風阻乏糧勸往馬八兒或可假陸

路達俱蘭從之四月至馬八兒新邨馬頭登岸其國宰相

馬因的問官人以何事至此庭壁告其故因及假道事以

不通爲辭與其宰相不阿里相見又言假道亦以他事辭

詰旦二人至館屏人令通事輸情言我算灘

譯言國主也

兄弟

五人皆聚加一之地議與俱藍交兵及聞天使來對眾詭

稱本國貧陋凡回回金珠寶玉盡出本國此間諸國皆有

降心若馬八兒旣下我使人持書招之可使盡降時庭壁

以阻風不得至俱藍遣哈撒爾海牙入朝計事期以十一

月候北風再舉至期朝廷遣庭壁獨往十九年二月抵俱

藍其國主迎拜璽書遣其臣祝阿里沙忙里八的奉表進

寶貨及黑猿一其後貢使時至未幾馬八兒果遣僧撮及

班入朝將至上京帝遣使返之途繼遣福建平章亦黑迷

失詣其國取佛鉢舍利浮海阻風行一年乃至與其國使
偕來進奇獸一似驃而巨毛黑白閒錯名阿塔必節其常
貢有花牛水牛花驢土彪成宗元貞二年遣岳樂耶奴等
使馬八兒賜其國王塔喜二珠虎符仁宗延祐初馬八兒
國王昔刺丁遣其臣愛思丁入貢

元史卷九十五終

附按勘節略

一原稟有刪易舊史者有刪補新篇者亦有全用成文者列史如班之於馬率多襲其辭緣事蹟掌故須有實徵未可憑虛臆造非掩取前人之作以爲己有也舊史疏舛四出魏先生重加討訂兼取眾長集爲傑構體例筆削是非褒貶不憚獨用主裁至於文辭固不期盡自己出也

一闕疑難昔班孟堅論司馬子長作史記采經摭傳分散數家之事甚多疏略或有牴牾蓋涉獵旣廣采輯眾說彼此不無或歧此固史家之常不可執一以詆其餘爲謬也新元史所紀事實間有與舊史異者如開國四傑博爾忽新史本傳稱其與孛羅脫渾同

征嶺北林木中部落李羅脫渾遇伏死博爾忽獨全
師返復偕多爾伯申討之盡俘其眾後從征西夏歿
於敵注云見祕史而祕史則稱李羅忽勒歿於征禿
馬惕之役太祖再命朵兒伯朵黑申討之盡俘其眾
其事在太祖六年辛未以前近世順德李侍郎文田
及秀水高寶銓注祕史謂李羅忽勒卽博爾忽而禿
馬惕爲林木中部落之一別無李羅脫渾其人舊史
太祖紀丁丑十二年書是歲禿滿部民叛禿滿卽禿馬之轉音
命鉢魯完卽博爾忽之轉音朵魯伯卽朵兒伯之轉音朵黑或稱或不稱新史多爾伯申乃通號譯言老也故
申乃朵爾伯朵黑申之省討平之據是則博爾忽至
是年猶存其事與祕史異而與新史本傳略符舊史
太祖紀多本於聖武親征記豈新史博爾忽傳實據

聖武親征記非據元祕史歟祕史別有元槩本未見其書抑所據或係元槩本祕史歟又赤老溫亦四傑之一祕史稱赤老溫爲速勒都孫氏其父名鎖兒罕失刺別有赤老溫孩亦赤係扎刺赤兒氏卽木華黎叔父也赤老溫孩亦赤之父名帖列格禿伯顏舊史忙哥撒兒傳稱其曾祖曰赤老溫愷赤愷赤卽孩亦赤之切音錢詹事大昕元史氏族表以扎刺兒氏之赤老溫愷赤與速勒都孫氏之赤老溫爲兩族兩人所稱四傑乃速勒都孫氏人新史開國四傑傳則以赤老溫愷赤當之是合兩赤老溫爲一人與祕史及錢氏族表竝異其誤會邪抑別有所據邪祕史稱赤老溫孩亦赤二子名統格合失而錢氏族表則

據舊史忙哥撒兒傳稱赤老溫愷赤之子名撈阿且
止一子是氏族表又與祕史不符蓋各所有本初非

臆說也又如新史叛王傳以與海都同叛之明里王

舊史紀傳作明里帖木兒
新史芟去帖木兒通號

即太宗七子蔑里攷之舊

史亦有不合

辯見宗室
世系表

然武宗舊紀稱大德十年至

也里的失之地受諸王明里帖木兒等降也里的失
即葉兒的石河憲宗二年封太宗子蔑里於此則以
明里帖木兒爲即蔑里似爲有徵其與海都同叛之
篤哇新史皇子諸王傳謂即太宗六子合丹之長子
觀兒赤觀兒與篤哇譯音相近朔方備乘又謂篤哇
爲太祖長子朮赤之子彼此莫衷一是至於稱順宗
曾封懷王亦於舊史無攷惟順宗本傳有至元二十

八年出鎮懷州之事順宗次子仁宗於大德間又嘗奉母妃出居懷州似因舊所分封而然者則封懷王之言亦有由來他如西域藩封傳以不賽因爲太祖駙馬而舊史文宗紀則稱不賽因爲宗藩見至順地理志西北地附錄不賽因及月祖伯及篤來帖木兒卽文宗時修經世大典地圖所載今以其屬地攷之似皆宗藩而明史西域傳稱元末爲賽馬爾罕王者係駙馬帖木兒西人馬禮遜外國史略瑪吉思思地理備攷亦稱蒙古青吉汗卽太祖成吉思封其壻不賽因於尋思千卽撒馬爾罕爲王是舊史中葉之不賽因原係宗王而新史太祖駙馬不賽因分藩西域者蓋元初同名者歟而海國圖志中載元經世大典圖則又以不賽

因爲駙馬賽馬爾罕之祖諸如此類紛紜無所折衷
魏先生博學強記薈萃百家之言元元本本隨條著
錄固不可膠據一說以繩其非其疑而無所質正者
姑闕置之夫從數百載之後網羅異代放佚舊聞其
中豈能無小得失則又不容揜微疵輕相詬病已
一酌存畱通號元代人名重複凡例以帖木兒海牙
拔都那顏火者荅刺罕的斤等稱皆美號非名也謂
凡名之連號可省者省之其不可省者畱之今遵酌
定例凡名之連號而有同名者則畱號以別之如阿
里海牙別有阿里伯顏帖木兒別有伯顏拜延拔都
魯別有拜延阿兒思蘭海牙別有阿兒思蘭伯顏不
花的斤別有伯顏不花明里火者別有明里之類若

概省去美號則同名愈多益滋齟齬其無同名者則
芟省其號如阿卜海牙別無阿卜擴廓帖木兒別無
擴廓之類然如此者不過十之一二原稟紀傳所芟
各號有宜復存畱者期免同名混淆也凡例亦云不
可省者畱之有以也

一史漢之表同姓王侯義主於封建故不及其餘至
新唐書始舉宗室悉表其世系雖疏微支裔不遺所
以序昭穆明親親也宋遼金諸史大約沿以爲法惟
舊元史既有宗室世系表矣復以宗王與姻戚諸王
竝表推其義例蓋以元初諸王竝無封號惟視印章
爲隆殺厥後雖錫國邑之名以一字兩字爲別

至大初宗

王禿刺封越王哈剌合孫謂祖宗之制非親王不得
加一字之封故世祖時惟皇太子封燕王皇三子忙

哥剌封秦王皇孫甘麻剌初封梁王改封晉王及而
皇曾孫松山襲封梁王而已其餘止錫兩字封號而

賜印之等如初故別列爲表以存一代掌故歎然宗

室表不注諸王封襲之年而諸王表又不詳其世系

此在唐宋諸史具有宗室列傳者尙可據傳以稽表

所未詳若舊元史既不立宗室傳僅列二表而表又

疏略若此加以名字重複冗俚譯文互異讀者茫然

新史諸王表已釐正其大端補載宗王本支所自出

惜宗室表尙未及訂定所幸原彙敘論尙有端緒可

尋爰蒐討舊史本紀傳志元代宗室事實其散見於
舊紀傳志者多有可采原

彙敘論謂太祖而下則以本紀參攷其
封賜亦大略言之非謂傳志不足徵也旁參近代各

家攷訂凡宗王名字之異同始封嗣位之時代與夫

分地食邑歲賜之頒元代宗藩分地多在塞外與所
錫封號名實多不符又各賜商

中土食邑亦非封號所視也意元史之表宗室凡有封號與無封號諸王均應詳其分地食邑其無分地食邑而有歲賜及特賜者亦應節取大要注之表中俄論謂參攷其封賜蓋重修大旨如此 朝貢使聘之文叛亂征討之事反覆推究彙錄爲攷證散附於表以存有元宗室佚事遺聞守闕抱殘區區之心有不容已若夫續成先哲未竟之緒則俟有道君子非譎陋之所能及也

跋語

舊元史之傲昔人糾之詳矣而數百年來訖無更新之作甚哉良史之才不易易也故高郵州知州同郡魏先生默深氏源以文學經濟名世著述甚富晚值粵寇亂東南罷官僑江淮絕筆成新元史往歲先生族孫午莊尙書以遺橐託其戚陳今柄謀鉞梓而屬歐陽備及代過爲之校勘伏案數年與備往復商榷始克就緒元代掌故其黠昧最難清釐而新史肆爲闡發者厥有數端一則有元疆域遠過漢唐而開國所平漠北西域數十部地方數萬里舊史竝無一傳簡策所見地名多與唐以前不相沿其古名存而未改者亦屢經變譯如辭迷思千

一日尋思千又曰撒麻耳千今爲賽馬爾

堪之原爲薩末鞬

唐書西域傳昭武九姓康如蒲華

一曰卜哈兒又曰不

花刺今爲布哈爾

唐書昭武九姓安

喝

如吉利吉思

又曰乞力吉思

唐書

斯直回紇西北三千里元

如幹端地志作忽炭

爲于闐

唐書于闐諸胡謂之豁旦元之

類皆譯文屢

更譯音亦轉離其本若夫幹羅思欽察阿速各國更

爲漢唐驛使所未至學者欲求辨方而不能遑問其

山川疆域邪新史勅補太祖太宗憲宗三朝平服各

國傳部畫州居俾窮荒絕域數百年如墮雲霧者豁

然得覩其方位雖閒有疏略而其高瞻遠矚闢榛莽

而啟津途足以補禹貢之缺步章亥所未窮已惟所

補阿母河和林遼陽三行省地志隨復散佚是爲缺

憾一則蒙古色目諸臣名與氏不相屬舊史有傳者雖本傳一詳其部族及散見史策則惟以名行而又同名居多加以轉譯屢易其字或一人而疑若數人或數人而誤爲一人侏儻混淆莫識誰是近世嘉定錢詹事大昕特補氏族表以詳其世系源流而後命名相溷者得晰其十之三四新史復於列傳變立史法分之以事類別之以時代凡名同者觀其時代不同而可辨名同而時代復同者觀事類不同而可辨又別列名字異同表表佚其綱領具見凡例以綜比而分合之如治亂絲無不縷析焉一則元代宗室舊史爲之立傳者僅六王至世表所載同名者多至數十譯音無定字與紀傳處處互歧不相貫串惟屢朝皇子及有

國邑封號而事蹟較著者尙依稀可蹤其餘率宗統
世次莫能究詰新史世表敘論謂太祖以上十世徵
諸祕史太祖以下則以舊紀參攷其封賜竝補其遺
漏良以舊紀所載宗室事實雖失之繁冗然猶足以
補列傳之所略故凡有封號者推其受封之歲無封
號而有賜典者元代宗室例有歲賜而又朝會有賜
賞功加恩有賜舊紀及食貨志尙詳攷其頒賜之時竝注之于表而諸王時代之先後名
字之異同辨之思過半矣復輯皇子諸王傳綜一代
宗室始終存其梗槩以與世表相經緯至中葉宗藩
煽亂雖東土旋定而西北數萬里遂淪爲異域終元
之世強示羈縻所關國運興衰者甚大則叛王傳之
補元史應有之文此皆重修所注意以張之者也

其餘芟繁補闕文省事增辭嚴義正一洗昔人所譏
舊史之敝雖橐屬搨成未遑潤色與夫散佚闕文尙
待拾遺而綱目燦然大體完具誠不可不傳之作也
惟未及先生之存自視成書所遺原橐其中已錄清
本者十餘冊多有抄胥倒亂及譌奪難於理會之處
其就舊史塗改各底本間爲他手竄易或至紕繆不
可思議具見校勘記略自媿槃燭之光勉盡管窺於
碣然明其舛誤者訂正若干條其所未詳則闕疑仍
舊以俟博雅君子爲之是正焉先是咸豐初代過先
從祖叔績先生禮闈報罷南還過高郵默深先生出
遼史彙於州署與之參訂適粵寇警至遽以橐相屬
而別先從祖旋與江忠烈公殉難廬州家藏著述遺

彙數十種後燬於同治初土寇之亂遼史彙亦不知
落於何處而是書獨延及尙書歷五十年而傳於世
小子從事校字所爲致慨於先從祖之不幸而爲先
生深幸者也家狀載先生所著書目如 聖武記
海國圖志書古微及所輯 皇朝經世文編久已

刊布於世海國圖志復經尙書重刊以廣其傳其餘
若詩古微公羊古微曾子發微子思子發微高子學
譜孝經集傳孔子年表孟子年表小學古經大學發
微兩漢今古文家法攷論學文選明代兵食二政錄
及所注春秋繁露老子墨子說苑六韜孫子吳子各
種並未見傳書倘按獲并刊都爲全書則又海內凡
識文字者所快觀也光緒丙午春新化鄒代過謹識